



普法戰紀

第六冊


リ 9  
6255  
6





119  
6255  
6

普法戰紀卷七



南海 張宗良 芝軒 口譯  
吳郡 王 韜 紫詮 輯撰

法自<sub>二</sub>爹亞議和不成。通國兵民仍持戰守前議。然而大局已不可支。其時旁郡之告警者紛然也。法之棣桑邑已為普人所取。普軍八萬人駐筍其地。是城雖不當衝要。而法之騎軍多出於此。其人多勇猛驍悍。長於馳驟。普人特徵民間輸納佛狼五十萬枚。以供軍需。普人既得此地。則可調軍由東方至卑辰干。往攻加厘波地。監勃利二將所統之兵。又可直往南方。一切餉糈由蔑士轉輸接濟。而又可遙為丹將軍之犄角。助其聲援。蓋丹



將軍以重兵扼守要隘。不使法之援兵得過者也。普軍擬濬鑿魯華河。直達多亞城。以便進兵。所有近城衛護疆宇之兵。盡逐去之。或往薩拉門。或往都羅窩。普人意在先圖來昂。而後徐下他郡。普郡王擬於來昂境外駐筍大營。十一月七日。普兵往攻紐布里薩外摩底亞礮臺。勝之。守臺將士降於普。獲大礮五尊。陳擒法兵二百五十人。來昂郡外各村民。徙避入城者。紛然不絕於道。多亞城新朝。檄諭衆民。謂苟見巴彥及其所部將士。有遁歸法境者。立即擒治。勿任縱逸。以其通敵賣國。罪不容誅也。法國南方瀕海地有馬塞里者。巨郡也。前有亂民。揭竿肆起。經地方官吏彈壓。立即安靖。是日普兵整隊入棗桑城。即地仁城。以法國從鼻音也。加厘波地將軍至阿頓。大閱鄉

勇。普軍於薩得。獲氣毬一。毬中書札無數。皆傳遞行軍消息也。乘毬者七人。悉按軍法鞫治。在瓦頓境中。有一氣毬。下墜於地。內有數英人。從法京逸出者。自云。將圖避難遠方耳。乃釋之。金匠卑星州多巧思。爲普相造一金管。通體作鵝羽形。極爲逼真。上刻伯爵職銜。精緻奇麗。殆無其匹。普相云。留俟將來書和約時用之。十一月八日。普人得瓦頓城。蓋法軍勢逼納降也。瓦頓城建於藐士河濱。池濠深廣。墉堞鞏固。城外四周。環以礮臺。形勢雄壯。爲法國衝要所。設防之密。駐守之嚴。蔑士以下。卽當次數及之。其城本非可猝下。前者迭戰於威安維爾。革里富律兩地。卽爲爭取此城也。城中輜重山積。糗糒芻芩。不可勝計。皆從法京輦運而至。以備蔑士衆軍



所需時。蔑士已陷於重圍中。故不得達。始法人思屯重兵於此。以扼要隘。而大軍退走。師丹遂置不顧。普人既下師丹。據藐士。時河中流尸枕籍。破艘縱橫。遠近村鄉。猶復團兵相拒。故必既肅上游。然後從事於瓦頓。始合圍於九月二十五日。普軍雲集。附於城下。晝夜環攻。不少息。法將知不能守。遂樹幟獻城於普。瓦頓城有輪車鐵路三。一達蔑士。一往泰安威兒。一至沙龍。城中居民一萬三千人。十一月九日。普國蔑多輪船與法國褒核輪船戰於夏雲那。巨礮飛銃。互相轟擊。礮聲沸水。烟燄蔽江。經兩時許。彼此皆檣傾桅折。不克再戰。普軍取捫巴厘兵不血刃。法魯華河上之兵。徵調已多。皆從各處雲集而至。不日將與普軍決一戰。有普軍游騎至其近

境者。法兵擊走之。陳擒六十四人。法國阿連郡城久為

普國丹將軍所攻取。

九月中。丹將軍統巴華厘亞兵三萬人。進攻阿連郡城。時法國守兵四萬五千人。出城決戰。為普所勝。遂取其城。

統兵入城據守。十月三十一日。多亞新朝定議。檄召諸道統兵官。合軍並進。以圖收復。特命阿厘兒將軍馳赴魯華河。與波厘亞將軍合兵。時波厘亞統領魯華河新募之眾不下十萬。十一月六日。波厘亞由鴉淺阿壁尼鄉。整隊出攻。九日清晨。各軍朝餐畢。列伍持鎗。以待命。法將俾得雲率之。攻刺厘華連拿打。因其地多葡萄園。為普兵所集。故也。巴厘將軍助之。為其左翼。以攻普軍中堅。後為普軍礮隊所擊退。是日下午。法軍退至哥兒麻。適見俾得雲與普軍相持甚苦。遂大呼。馳入助戰。水師提督渣利嬌巴厘居巴厘將軍之左。首先突陳。時普



國礮隊。左右環列。乃以巨礮。由詩西捫芝佛尼攻其前。由哥兒麻擊其後。第三十七隊法軍。往攻珊鄉。勢甚鋒銳。然普軍布陳整肅。礮隊與步兵。相間爲輔。合力以擊法軍。故法軍既進旋退。互持至日西墜。時法國礮軍驟至。火彈橫飛。密如星雨。遂勝普軍。是日。法第三十七旗步兵。三十三旗壯丁。死傷甚衆。因礮軍來援稍遲也。西刻。水師提督渣厘嬌巴厘。進兵珊鄉阿彌條鄉。驅逐普軍。二鄉旋爲法兵所取。普之巴華厘亞兵。離隊退走。法軍以礮橫攻之。法將厘有統領騎兵。都統李保奇督帶民壯。奮力追擊。普兵以礮扼要隘。環轟迭放。騎兵不得前。乃止。此役也。與法軍相拒者。僅第一路巴華厘亞兵。以及騎隊礮隊而已。普軍既敗。遂由阿連郡退走。亞田

尼。爲法軍所擒者。二千人。臨陳傷亡者。不在此數。因雨雪之後。道路崎嶇。泥淖陷足。殊不易行。法軍追至勝巴刺威。始旋。又於其地。擒兵百人。獲礮二尊。統兵官五員。火藥二十車。輜重器械數車。是日。法將波厘亞進兵甚遲。行七時許。僅至芝威厘鄉。若早馳抵其境。夾攻合擊。則俘斬巴華厘亞兵。當無噍類。法軍死於戰者。一千五百人。初。法人援軍四集。圖復阿連。由雲耽駐營於鏢尖時。普軍由字干往馬尖尼。其地近聖羅連。林木叢茂。一望皆碧。先突出以攻法軍。爲法軍所擊退。此十一月八日也。翼日。法軍先往攻普營。法將巴刺顛始欲環圍阿連城。以困丹將軍。故特調法軍左翼之在鏢尖時者。馳往阿連。右翼屯於阿迷。阿連城外鄉落固守營壘。以爲犄角。左翼



既奉命由芝覓尼勝巴威波喇布來。撤隊旋行。與筭在聖卑玉沙來亞。外阿連城波來他之法兵相合。同屯沙吉。是日由曉苦戰至昏。法軍初復孛干。再復哥美亞。法國山時將軍從芝覓尼而進。旋與普兵大戰。勞仁將軍屯兵於極左。向勝巴厘威刺哥林卑而來。於是四周環集於普軍。幾於以五攻一。法人以爲此役也。丹將軍雖身有羽翼。亦難奮飛。俟其退兵入城。則坐困之。殊易易耳。特丹將軍巴華厘亞之名將也。智勇足備。韜畧深沉。其行軍也。善於量敵而後進。已早知魯華河法兵勢衆。阿連郡城勢孤。故不徒事固守。而先出境以決戰。至是以法兵氣盛志銳。不可以力敵。遂下令退兵。時麾下步卒僅一萬二千而已。撤陳之際。具有方畧。步伐隊伍。井然不

紊。於是且戰且行。法軍追而薄之。或搗其中堅。或蕩其右翼。適所部驍將阿富統第二隊由左方至。疾馳往救。短兵相接。幾勝法軍。俄而法軍大隊驟至。遂復敗北。當退兵時。先以礮隊扼險爲殿。故法軍不敢逼。普軍乘夜退往亞田尼巴題。將擬由巴題抵法京外。乞援於大營。是夕天黑道艱。普軍多有失路散亡者。法人既勝。巴刺顛檄令三軍輕騎往追。其時鏢尖時尙有普軍。屯據要地。故勞仁將軍不能取道往勝巴厘威。旋恐中有設伏。遽引軍退。山時將軍亦觀望不進。不敢取道芝覓尼以襲普軍。旋即撤隊歸營。惟波厘利將軍兵至最遲。其氣尙壯。引兵獨追普軍。進兵至沙吉詩威厘左右。擒獲普軍後隊而止。是役也。普軍歷戰二日一夜。幾於人不及



傳餐。馬不及秣芻。以少敵衆。枵腹持鬪。故至於敗。陳喪  
麾下統兵官一百四十二人。兵士六百六十三人。據法  
國郵報云。普兵死傷相藉。不下三千人。然法兵之臨陳  
喪失者亦衆。是日遣別將往攻阿連郡城。兵圍於外。而  
民應於內。普國守兵單薄。遂至不支。而在魯華河左右  
法兵攻城尤力。十日清晨。遂將郡城克復。日耳曼餘兵  
紛紛退出城外。普國丹將軍既統兵退走。亞田尼翼日  
潰衆復集。然皆疲沮不堪。復戰。因休兵一日而行。旋遇  
普國援兵至。卽由亞田尼退駐多利。建營築壘。屯於村  
外。其地離阿連郡城七十五里。而距法京頗近。普人聞  
法兵圍城甚急。遣將谷威迭偕阿耳伯王子統衆往援。  
取道於薩但利進兵。計普之三將所統士卒約有六萬。

時麥蓮畢公爵亦統衆馳至多利。丹將軍遂與合兵。麥  
蓮畢公爵麾下士卒亦不下六萬。兩軍既合。卽擬往攻  
魯華河法兵。而普郡王亦由蔑士率軍直下矣。是役也。  
爲法用兵以來第一次奏捷。魯華河之法兵勇猛敢戰。  
數約九萬。時法國統兵者巴刺顛將軍也。戰事既畢。巴  
刺顛出示曉諭衆軍。其略曰。咨爾衆士。昨日之戰。我師  
獲利。敵軍各營皆爲我兵所據。今敵已退。克衆復城。功  
殊偉焉。惟余以爾衆一心一志。致力用命。已將爾功上  
達朝廷。朝廷不勝嘉獎。特命加意撫循。以示鼓勵。茲者  
我國正當逆境。爾衆爲舉國之望。目所共覩。尙其奮勉  
忠勇。激發義憤。俾爲我國所倚賴。惟爾衆勿失所望。余  
實有厚幸焉。是日捷音至京師。多亞城中人心大悅。皆



曰。此次告捷。可以止南方之普兵。以絕普將瓦得進取之路。然法軍雖小捷。而於普軍進圍法京之大勢。無所繫其利害也。其時普郡王屯兵伊邇。與其將瓦得之營相距不遠。可以彼此相爲犄角。麥蓮畢公爵亦已統兵往助圍城。曾何解於大局哉。使當是日乘勝窮追。兼程進襲。無使普軍得以稍延喘息。則丹將軍之全師必覆於亞田尼。師覆帥擒。士氣必倍。如是則普軍勢分。而法京可援。重圍之解。事未可知。雖然法之護國統領德祿蘇亦一庸才耳。今計法京兵數不下五十餘萬。多於普國圍城之師。卽曰其中實能衝鋒臨陳者不過一萬二千。而加以演習訓練。一月後卽可使成勁旅。况又有外援哉。統核法京中壯丁十二萬。兵丁十二萬。一萬一千。護勇三

十萬。論者皆以爲有衆如是。德祿蘇如有材武幹略。儘可以之退敵矣。乃不能出雷池一步。何哉。普國丹將軍既敗於阿連。軍師毛奇聞之。謂其左右曰。丹將軍以四萬兵。當法國十五萬衆。鏖戰兩日。乃始退走。既退而敵猶不敢逼。其能兵如此。雖敗猶勝也。日報文士謂普人阿連之敗。首相與軍師早已逆料及之矣。而竟聽其挫北於法兵者。蓋特借以折巴華厘亞王之銳志耳。以王與普國素非相協。自以雄長南邦。不願爲普下。今假手於法以敗之。使其兵獨出。而無普助。則無能爲役也。然此特旁觀推測之詞耳。普廷將帥其局量當不如是之隘。其智慮當不如是之狡也。普兵自薩得依潭退出。因聞法兵之來攻也。法國總理大臣大陳將士簡閱軍



容。檄諭諸道軍入援法京。京中糧儲尙足以支一月。於多魯士集募新兵。已成一軍。普人擬於不日間以大礮進攻泰安威兒毛蔑的。十一月十日。紐布里薩獻城納款於普。俘統兵官一百人。兵士五千人。礮一百尊。法將宏得查暗自多亞城出。普軍逐之遂回。北日耳曼廷臣集於普京伯靈會議。普國丹將軍既敗於阿連城外之哥兒媽。十一月十三日。旗總加拿士飛檄大營曰。今謹將第一路巴華厘亞兵。戰於哥兒媽始末。具陳如左。是月初旬。丹將軍聞敵人已據摩亞村麻厘村。自此一帶悉駐重兵。又由他道取馬尖尼。其地林樹叢雜。宜於設伏。此外更有法兵數隊。直達魯華河左右。其前鋒驍騎已屯於摩亞村。時偵諜之使。不絕於道。九日以前。警音

迭至。咸謂魯華河上法兵。取道哥兒媽進攻阿連郡城。在旦暮間矣。八日將夕。丹將軍頒令於軍中。拔營盡起。秣馬厲兵。向西直進。留步兵一旗。嬰城固守。將擬在哥兒媽及許饒村左右。建營築壘。以禦法兵。翼日前隊銜命進師。辰刻。遇法軍於半途。詢之所俘法兵。云。彼軍乃由耽麻厘而來。法國魯華河上前列之兵。乃法將波希所統。郵報傳述云。及其數不下六萬。由理蠻迤征。理蠻距多亞城西北約三十有六里。離薩雕但西約四十有二里。是晨。敵人以步兵六隊。馳擊巴華厘亞兵營壘。兩軍既接。而敵人助戰之師。絡繹而至。益以騎隊六旗。保衛陳角。以巨礮一百二十尊。排列陳前。力攻普營。迭擊環轟。其勢甚銳。然法軍雖衆。而巴華厘亞兵踴躍赴鬪。



有進而無退。有前而無卻。敵人屢陷我軍之右翼。右翼之兵。無不奮死抵禦。力擊之回。敵人兵卒死傷如積。是以能由曉至昏。守營而不失也。迨暮敵軍撤隊而歸。丹將軍乃始爲退兵計。由哥兒媽退往勝巴威厘。使與由沙得華西路來援之新兵。可相接應。退兵時。步伐隊伍。極有方略。無一亂次以奔者。敵人於是夕。攻據阿連郡城。竟不追襲我軍。城中遺有病卒千人。以倉猝間不能攜載。於是軍中嘖有怨言。兼以戰鬪之際。不及傳餐。多枵腹以從事。遂有謂糗糧之不敷。而生缺望者。是役也。統兵官臨陳傷亡者。四十有二人。兵士六百五十人。翼日後隊輜重一車。統兵官一。軍士八十。爲敵所擄。是晨我軍由勝巴厘威。退駐多利。而麥蓮畢公爵援軍亦至。

遂與合兵。九日之戰。以寡拒衆。而敵不能入我中堅。僅能披我右翼。相持竟日。卒出死力。擊退敵軍。出險入夷。轉危爲安。丹將軍退兵。大略如此。敬卽檄聞。十一月十五日。法國廷臣。命巴刺顛將軍。統領魯華河上法兵。一切歸其節制。以波厘亞督帶第十五路軍。前日普法議和不成。局外諸國。皆爲之扼腕痛惜焉。議者謂。普法構兵。法幾至於一敗塗地。英法爲唇齒之邦。理宜爲之排解。即使堅守兩不偏助之義。而於勸和定約之間。當可力爲說詞。毋使法之終於不振。而乃一若絕不相關者。何也。則以英國決意起兵助法之時。正在英京郵報總局刊錄普相所寄密約之候。英國廷臣一見此約。雖欲興師援助。而心旣懷疑。志多未愜。遂至按兵不出。作袖



手旁觀矣。蓋因法國先王嘗有言曰。若法國得取比利時國土。而割據其晏威核地方。駐以重兵。守以水師。用以順流直下。此無異於以最利之火器。扼英國之吭。而制其死命也。故此密約。雖云取比利時。而其志實注意於英也。按普法所立密約。當未必可信。此正普相離間之妙計也。行兵之道。譎而不正。亦所尚也。普相蓋有之焉。英京郵報總局主筆者。皆名人才士也。其所論述。皆軍國重事。才識學三長兼而有之。閱是郵報者。皆英京中王公貴人。其所論。直有足以維持清議者。於普法戰爭之事。時有論斷。以爲爲法計者。惟有出於和而已。夫今日者。法之利在和。而不在戰。固夫人而知之矣。以法此時屢戰屢敗。兵氣不揚。民心已懾。實不可復用。彼齊

之田單。以彈丸之卽墨。能復七十餘城。亦以騎劫爲將耳。若望諸君不被間而去。則事之成否。未可知也。當明之末葉。法嘗爲英所亡。而其時王子猶在。雖擁孤軍。名號尙存。南方諸郡邑。皆安固無虞。而英又航海以來。不無有一水之阻。藉戰艦爲聯絡。所以以一女子神道設教。竟能復之於一旦也。事在一千四百二十九年。時英人已下法京。法王子復侵地。立王爲查爾斯第七。女名若安。法之亞爾格部人。與英戰。輒敗。收兵爲孤軍。得女爲孤軍督。卒退英人。今則非昔之比。然則當如何。曰。暫屈以求和。勵精以圖治。然後淳焉以興。一舉雪耻。普之圍法京也。法京外人民。都有未及徙者。普軍使之助築礮壘。不從者。持戟之士。自旁楮撲而守城。法軍見之。則又呼叱之。使無得供。普奮掘。苟言之不聽。立卽鳴鎗轟擊。故法民於此進退均難。不勝虐苦。日耳曼人向時旅居



法國往來貿易無異土著。茲為法官所逐者約二萬。皆遷往瑞士。蓋法國東境比鄰也。瑞國官民無不待以厚禮。中有一婦最為老壽。年百有六歲。二十五歲時往居法京。至此蓋八十一年矣。久居如此。而仍復見逐。於以見法之薄於待人矣。普國營中有女子從軍者。誠異事也。女子名威士。日耳曼人。年二十有四。幼即男裝。就外傳。稍長博通載籍。而性情豪逸。意氣倜儻。直能洗盡閨閣鉛華之習。且又潛心武備。好讀兵書。每於同學中。縱談韜略。無不為之折服。遂矢志入軍籍。以技勇超群。考拔旗首。普國軍興。遂從事焉。嘗陳前躍馬入敵隊。擐一大旗歸。獲賞勇銜。自此益慎其職。誓欲以身許國。勒功旂常。而銘勳竹帛。後以飛彈中傷。求醫返國。里中人審

知其為女子。無不嘆異。或更羨其有志焉。夫以一弱女子。而竟肯置身戎馬。效命疆場。則不獨近日巾幗中所未見。即求諸前代。亦未易數數覩。擬之荀灌突圍。木蘭從征。並此而三矣。其與昔日法國奇女子若安。不亦可追踪比烈也哉。近人有論及是事者曰。嗚呼。威士者。真今之奇女子哉。是可與一弱女子。向干戈。與驍兵悍卒。為伍。而願令人莫辨。鳥之雌雄。此其事實。有萬難者。雖執桴鼓。以從事。如宋之梁夫人。紅玉。亦不無其人。然以女中韜略。策勵戎行。非如木蘭之舍

一。味者。又豈獨木蘭為然哉。即如威士者。固今之木蘭也。其所以從軍之故。雖殊於蘭。而其從軍之况。則無異於蘭。聞威士身受四創。卒邀無恙。端俛既露。姓字遂香。從此聞閣英風。不將遍播於海國也哉。十一月十四日。麥蓮畢公爵。敗魯華河法兵於多利。十五日。調集諸道日耳曼兵。向法國東南境進發。攻據土魯邑城。以駐大營。普國丹將軍。益兵一萬五千。再圖進取。普郡王行師神速。已抵雍尼河。法兵在卑路佛



城。出攻普軍。普軍奮力逐之。旋退。陳傷法兵二百人。普軍之屯於阿連城北者。再行退出其境。因恐魯華河上法兵潛襲之也。亞眉得王子。向曾兼襲奧士打公爵。現居西班牙王位。特開國會。集議公舉者。一百九十一人。其不從者。一百二十人。十六日。南日耳曼邦巴華厘亞。願與普魯士成爲一國。以後國政軍事。得以統轄。在華西路大營。結盟定約。永垂不替。普人命國中。預製戰襖六十萬領。戰鞞六十萬。事以備軍前應用。觀此知普軍並無退志。將在法國爲卒歲之謀矣。法京中人。被困已久。甚爲患苦。無不思集赴國會議事。以求暫爲息兵。奈法廷執政諸臣。如德祿蘇監。必得皆以和議爲非。必欲邀功於一戰。十七日。麥蓮畢公爵。敗法兵於土魯。俘獲

無算。法兵竄往里蠻城。是日與普軍戰者。乃法卑烈丹尼壯丁也。訓練未久。故臨陳易於奔北。魯華河上法兵群集於阿連亞田尼蘭爹耳。與普軍小有接仗。十八日。麥蓮畢公爵。敗法兵於薩雕紐父。陳斬法兵三百人。生擒二百人。而普軍喪亡者。亦不下百人。以大利將加厘波地。統領法兵。在仙郡薩棣龍左右。與普軍戰勝之。俘斬日耳曼兵七百五十人。加厘波地固以大利之宿將也。素習韜鈴。戰功卓著。茲於是役。出其不虞。攻其無備。故克獲勝捷。論者謂。此雖小試其技。然亦足以見一班云。二十二日。普軍圍攻刺佛非亞。謀再濟師以困之。旋爲法軍所逐退。時法之捫梅地迷師亞。皆已被困。法軍援師四集。遂出與戰。竟敗普兵。陳斬五百餘人。普圍法



京益嚴。所有攻城之具。俱已備集。麥蓮畢公爵。統率所部。向西捷進。第九路普軍。誓欲再取阿蓮城。以洩前忿。蠻雕飛將軍。駐扼法國北方。漸逼法京。普人擬諸道並進。堵截魯華河上法兵。其謀蓋甚秘云。日耳曼兵。群取道於胡薩厘左右。進取法地。旋據都魯士。以屯軍。法將褒巴奇。統領魯華河第十八路法兵。法兵之雲集於魯華河上者。擬刻期大舉。所有備禦之法。攻拒之策。皆極機密。法京中糈餉尙充。日用無缺。兵民皆志在一心守禦。意氣猶爲雄壯。在城日試礮位。較量落彈遠近。俾有準則。不日卽將出城決戰。於城外。邀獲普國衛糧軍士一群。日耳曼兵。攻據法之挪更李魯多路。普郡王進兵卑地威亞。所統部衆。計十有五萬。是日普將棣里士求。

擊退法兵。出俾路佛之外營。法軍狼狽而遁。紛無行列。普兵復襲其後。法軍再敗。於二十二二十三兩日間。有普軍二萬。往取俾廉。後欲改道攻取里蠻。二十四日。泰安威兒爲普軍所攻。飛礮入城。室廬盡燬。赤燄亘空者兩日。不得已出降於普。俘軍士四千。獲礮二百八十尊。普軍喪者。未甚衆。法人之在法京外者。聞是消息。爲之奪氣。同日。普軍取聖堅田。普國都統勞得列士。在亞棉城外。與法國壯丁戰。敗之。法人狂奔而遁。盡委其輜重於道旁。徑向波厘而去。普與法國亞魯西士郡之民。壯立約。若出與普軍相戰。則其物產盡行歸公。二十五日。普軍取威布厘門。都波路沙域尼。普軍於夜間。以電報鐵線。圍繞營壘。又於架上。懸鐘報警。故猝有不虞。其



兵易集。是日法軍之在薩離但者。與屯筭其地之普軍戰。相持約兩時許。法軍左翼勇氣百倍。普軍遂專攻其右翼。意在擊瑕以敗偏。然法兵厚集其勢。卒勝普軍。此役也。普軍本欲入亞田尼城。爲法軍所擊退。普軍出紐威兒。普軍被擒者八十人。死傷者亦殊不少。法軍陳亡者無幾。初法軍列陳甚長。繼在阿連郡境。減隊併伍。極爲整練。故得以取勝。此一戰也。法人小捷。氣爲之一振。南日耳曼邦戈添畢與普魯士聯爲一國。於二十五日立約於華西路大營。普國廷臣開議院於普京。院長讀普王所頒之諭於衆前。謂邇來日耳曼諸邦。豐獲捷音。余心不勝嘉悅。然法國將來必圖報復。其或乘機觀釁。以冀取償於普。事所必有。情所必至。所以約中必取其

邊境。以固我疆圉。內以禦侮。外以制敵。如斯而已。普王詔於國中。令撥一百兆麥刺。以供餉費。普法兩軍連日小戰於亞棉。互有勝負。普軍於李文雲頓連界之間。亞田尼左右。較試礮位。以角優劣。有氣毬一。從法京啓行。至奇利辰拿而下。更有鵝鴿一群。帶書札。日報甚多。普軍見其在空中。以鎗擊之。略高不得及。二十六日。法軍數隊。攻第十路普兵。爲普兵所敗。法軍死者四十人。陳擒將軍一名。普統兵官喪者三人。兵士十三人。此在阿連郡城左右之戰也。普法兩軍旋又戰於亞棉城左右。褒富士境上。法人自謂。擊退普軍。驅之境外。以大利將加厘波地。統率法軍。由巴橋出兵。力攻普第三枝步兵。銳氣甚盛。普漸不支。後有日耳曼之鶯查兵。繼至來援。



普軍復奮。遂擊退法軍。法軍紛紛遁走。盡棄其輜重而去。器械衣裝委地者山積。盡爲普軍所得。法之退師。極無方畧。於此可見。二十七日。普軍取刺非亞。初普軍以大礮轟攻刺非亞城。經兩日。守城官卽樹降旗出獻。所俘兵士共計二千。獲大礮七十尊。在附近阿連左右普軍第十四路中之第二十四枝兵。正當奉調遄征。銜枚疾進。忽遇第二十路法軍。遂與之角戰。法敗而普勝。逐法兵出厘。但及迷師亞。生擒法兵一百四十六人。普兵喪者二百人。普國瓦得將軍統兵三隊。逐法軍於布林俾亞。死傷者約四百人。普兵於此兩日間。臨陳殞亡者亦衆。普第一路軍大戰法國北軍於亞棉城外。相持至暮。普軍獲勝。是役也。法軍多於普軍喪者數千。法軍逕

趨洵美河。遁走向亞棉城處礮臺而行。普國蠻雕飛將軍。於二十七日。攻法國北軍。戰於洵美河側。兵至卽勝。盡驅法軍向西里河而走。遁於亞棉城外之南境。法軍傷者數千。未傷而生擒者七百人。奪獲法之壯丁新旗一桿。二十七日。普法之兵。於亞棉左右布離多紐鄉及蘇辣村。竟日相戰。初合陳時。法軍小爲得利。迨至未秒。兩軍戰酣。普之礮隊雄猛。其來益多。法軍勢不能支。不得不退。是日法軍在布蛙。又爲普兵所擊敗。其在帶利者。聞兵敗之警。謹守營壘不出。是日之戰。普軍約三千人。法國於民間再籌一百兆。爲軍需。以充精餉。普國朝廷貸於衆庶。得一百兆。運至華西路大營。當下議院集議之時。從此說者一百七十八人。不從者僅



八人而已。二十八日。普人往攻法兵於魯華河勝之。先是法人以重兵屯於魯華河左右。遙爲法京聲援。屢出攻撲。普以其爲法京犄角也。思有以驅之。是日特撥第二第十路兵。進圍其營。法軍亦布陳以待。由午至暮。轉戰相持。卒敗法軍而還。巴華厘亞與普立約定盟。入於聯邦之中。約內有云。嗣後巴華厘亞不爲前者北日耳曼各邦所立之六十一至六十八款所制。因其國之兵。向爲國王所管轄。今一切軍制。宜悉依聯邦規例。統歸於大經略。由其節制。於昇平時。可以隨時簡閱。若遇興師征伐。卽行出兵相助。戈添畢邦亦願入約內。共二十有六邦。聯爲一體。蓋普之協比諸邦。輯和衆志。其效有如此者。觀於此。則普之振興可知矣。自二十六至二十

九連日晚間。法軍之防守京師者。恐普軍突出不意。夤夜進攻。迭放鎗礮。以拒普軍。自宵達旦。其聲不絕。究之距普營尙遠。於普軍無所損也。徒糜藥彈而已。普軍圍法京。自七月二十日始。環布四周。重圍固繞。法人由是日困。蓋自始圍至此。相持兩月之久。普王令於軍中。攻具已齊。不日乘機度勢。卽當轟攻。二十九日。法京兵民。齊出布陳。與普軍大舉決戰。其在前列者。第一第二路也。勇猛善撲。銳氣百倍。普出第六路軍攻之。兵刃旣接。普軍無不以一當十。法兵不能支。遂敗北。紛然退入城中。城守愈爲戒嚴。鎗礮之聲。竟夕不絕。三十日。法軍又自城突出。索戰。攻擊普軍。時普人屯兵於仙河蠻河。結營甚整。已秒兩軍奮力相持。搏戰殊苦。日耳曼南邦戈



添畢兵。北邦薩慎尼兵。皆出接戰。第二第六兩路零隊之兵。亦協助夾攻。自午至酉。法軍退走。法京城守兵。尚多於普國圍兵。幾約一倍。惜法國統領之不能用也。法將雕哥律統兵。入法京固守。後乘巴刺顛與普戰於魯華河時。整軍五萬潛師出城。以襲普營。時十一月三十日。普之瓦添勃兵。建營於威刺。更有第六路普軍。屯於附近。以爲犄角。別一法將率兵。往襲以便拿之。普營是爲第四路普軍所屯處。當法軍突至。普軍未及先爲整備。兩軍初接。普兵少卻。法人小爲得利。後爲第六路普軍奮勇擊退。惟第四路普軍在前列者。多有殺傷。計陳亡統兵員弁十七人。兵二百人。是日法軍衝突出戰者。原欲與魯華河上之法兵相接。惜其卒爲普軍所阻。

截。未得聲勢聯絡耳。時普王大營。屯駐華西路。戰畢。以電報傳信於王后阿家士得云。頃在法京之西近里奚左右。法軍突出索戰。爲我軍之第六路所擊退。陳擒法兵一百有奇。敵人死傷者共數百人。我軍喪者一百人。今日法京之東。又出挑戰。攻我國之瓦添勃薩慎尼兵。屯駐於搬鳥兒沙蠻珊辟呢威厘亞四處。法兵正欲乘其不備而襲之。轉戰而前。力猛而氣銳。勢不可當。普軍不支。爲之暫卻。於是四地皆爲法軍所取。後賴我兵第七枝軍繼至。相助夾擊。軍勢再振。我軍呼聲動天地。無不以一當十。法軍氣竭意沮。各鳥獸散。於是我兵乘之。而四處遂爲我軍所克復。是日薄暮。法京東北聖田尼境上。法軍出戰。以襲我之第四路軍。時我不能離華西



路而往援。因我欲據守中堅。以指揮各軍進止也。大抵法人見其將巴刺顛戰於魯華河上而勝。得以驅我衆克阿連。聲勢正壯。遂欲迭出攻持。與之連接。然卒爲我軍所覆敗。而此謀不克成矣。同日魯華河上法兵亦敗。北。初法將巴刺顛統兵七萬。由阿連郡繞道往寬丹布路。欲由其處進兵。往援法京。行未及半。爲普軍所截。彼此鏖戰。法不能支。法軍臨陳。死亡者一千。傷者四千。生擒者一千七百人。是爲法援兵之一。又法國機利地利將軍。別帶一軍。由薩雕。但沙得土魯三處進兵。其地皆普人屯軍所也。正扼險要。殊不易進。乃繞出其右。普軍知之。立即出營布陳。環圍截殺。時普軍分兵爲三。由蔑士新至之兵。爲普郡王所統。直取阿連。爲中堅。普軍之

建營。在俾地威亞捫打治芝現三處者。爲左翼。麥蓮畢公爵爲右翼。萃攻法軍。於是法將機利地厘之兵。爲普軍所擊退。是爲法援兵之二。斯時京師之勢愈孤。而法軍之在外者。更形單薄。普人既擊走法軍。後乃向理蠻及雲巖進兵。前二十八日。普法兩軍再戰於亞棉。初戰普軍稍北。普統兵員弁陳亡者十有四人。軍士死傷者一千三百人。普兵銳氣仍不少挫。轉鬪而前。法人大敗。是役也。法之亞棉城。納降於普。法之統兵官死者十有一人。軍士陳亡者三千餘人。是日。普法又戰於根美里及威利里亞。普將阿褒威士。率第一第三路瓦添勃兵。爲左右翼。夾攻法軍。大勝之。陳擒法軍三百人。普統兵員弁陳亡者七人。受傷者三十四人。兵士死亡者七百



人雖捷而所傷實多。二十九日。普人敗法軍於難尼威兒。三十日。普軍圍俾路佛。普將統兵十萬。拔營前往。別本云六分三路並進。一由留窩為攻取計。一渡瓦士河及巴龍河。既渡河。乃由薩尼及丹邑。取道而前。一由士伯橋及拉薩卑爾橋。第三路軍既抵薩尼。擊退法將杞拉之兵。三路普兵既集。遂環圍俾路佛城外礮臺。普人築壘掘濠。為久困計。凡遇附近村鄉中壯丁。即強令供畚掘之役。故民甚苦之。多有遠徙者。十一月三十日。法京外之戰。有日報主筆之士。曾身親目擊。叙述顛末。甚為詳悉。云。及是日。自旦達暮。法京中調集士馬。舉動紛然。自二十四日以來。每至夜間。京中各城門。悉下鍵置守。管鑰謹嚴。雖有文憑。亦毋許出入。法京城外。兩河交滌。蠻

河出其東。仙河出其南。循兩河而行。即可直抵法京。蠻河之北。有雲仙尼村者。林木蒼鬱。樹蔭蔽虧。幾於彌望。皆碧。相距不遠。有追威利村。挪全村。布禮村。一帶俱有礮臺。而刺花山。打利礮臺。最為鞏固著名。即在其處。仙河之南。有薩連頓礮臺。相去數百武。即為克里爹兒鄉。此鄉之外。為門迷利。法京外之雄鎮也。普人以重兵鎮守其地。多築礮臺。其北即珊瑚碧尼鄉。法京之南。由仙河及藐頓相間處。營壘環繞。礮臺林立。此外則為平原。坦廣無垠。平原盡處。則有拉奚鄉。詩威利鄉。堤鄉。胥師里來鄉。數鄉皆近枕仙河。距法京十有五里。二十六日晚間。法國雕哥律將軍。統兵千萬。巨礮四百尊。屯於卑地雲尼鄉。雲奈將軍。督兵一萬五千。屯於威利。遭鄉之南。



別有一軍屯於聖顛尼鄉。以爲疑兵。是晨雲奈將軍向刺奚腮士兩鄉而進。佯示取道於此。欲使普人集兵邀截。而後離哥律將軍架橋以渡蠻河。由卑魯大道得潰重圍而出。蓋俾普人一時不及覺也。是日亭午。法京外礮臺施放之聲綿連不絕。主筆之士往南方眺視。於時火光若飛電。礮聲若雷霆。迨至未秒。其聲始歇。頃之又作。聲益猛厲。若崩山谷。申刻雲奈將軍區所統之兵爲兩翼而出。一攻刺奚。一攻刺加阿褒。負礮壘取之。其地距腮士里來。僅三里許。普軍退回腮士。攻刺奚之法兵甫進。卽爲普軍所扼。迭用大礮轟攻。法兵冒死衝突而前。旣相逼近。普軍遂與撲戰。持拒正苦之際。總統德祿蘇卽令收隊。旁助一軍亦同時撤回。翼日昧爽。離哥律

將軍擬督兵渡河。特橋低水溢。終不克濟。於是不能往。阿連與巴刺顛將軍相接。以通魯華河上之援軍。旣畢戰。法京外威利亞村。僵尸蔽野。流血成渠。有法軍六十一人同時戰死。連肩疊背。局臥一區。相間處不能復容一人。頭枕威利亞村。足向法京者居多。蓋當退時爲普軍所驅殺也。有塞慎尼兵數人倒地氣絕。臥於其旁。法兵中有被傷而猶能行者。有死後以手自掩其創者。有旣死猶張拳作復仇狀者。有自將所携囊枕首而斃者。有危坐於地作笑容者。有一手持杯水。一手持餅餌者。有合手祈天。如求垂佑者。其狀種種不勝枚舉。布禮威利亞珊碧尼一帶村鄉。縱橫枕籍。幾於觸目皆是。是役也。法兵約陳亡三萬餘人。普人所謂之師。爲塞慎尼邦兵。



戈添畢邦兵。由奈士往珊碧尼鄉相間處。布陳拒戰。塞慎尼兵在北。戈添畢兵在南。與法兵苦鬪。三日夜。然後法兵始退。法人由亞負倫勞士尼挪全沙連頓等處礮臺。用礮攻普軍。普軍退駐於一小阜。十一月三十日。十二月二日三日。皆戰於其地。論者謂普法勝敗全係乎進兵之遲速耳。普事事先法一着。而法遂事事爲普所制。法始遲於出師。使普軍得以入境。再遲於蔑士。三遲於魯華河。而法遂不可爲矣。十二月三日。普郡王敗法將巴刺顛於阿連城外。四日。普軍復克阿連。先是。普郡王統領第三第九路兵。逐法軍往詩威厘村。麥蓮畢公爵布陳於西隅。以驅法兵。大獲勝捷。生擒法軍一千人。獲巨礮四十尊。翼日。普將蠻士田督率麥蓮畢邦兵士。

與法軍苦鬪兩日。遂入阿連城。獲礮三十尊。俘兵一千人。法兵遁出城外。普人追奔逐北。斬馘無算。法將巴刺顛既敗退兵。多亞新朝命其固守阿連。效死勿去。巴刺顛謂此時勢已危逼。我不退兵。必有巨禍。將置全城生靈於何地。移文多亞新朝。使允其所請。五日清晨。護國廷臣監必得克里苗克里卑腮共議於朝。飛檄諭之云。始謂阿連郡城。地當險要。且又密邇法京。可藉以據守。以張外援。今據汝所陳。宜暫退兵。以爲後圖。是以謹如所請。冀免民禍。特將成命收回。便宜行事。汝其勉之。是午。巴刺顛覆函云。茲者度勢揆時。已有轉計。特命第十六十七路兵。馳往策應。再命第十八二十路兵。馳往守衛。我入阿連城中。盡於其職。初法京廷臣。命其拒守。則



請退兵。及命其退。則又欲守。立論靡定。漫無成見。兵部大臣特駕輪車往觀。於申刻抵刺卑兒。已不能前。因普軍騎隊已環圍以逼之故也。旋退回保賤士。翼晨遂返多亞城。適接波厘亞將軍移文云。阿連郡城已於前夕失守。普軍勒令退兵。否則以巨礮轟攻。無分玉石。故茲已退駐城外。謹告。六日。普軍入阿連城。旌旗蔽日。鐃角喧天。皆欣欣有喜色。既入見法民之倚立於門閭間者。無不素衣喪服。濡淚承睫。目盡腫赤。手都挈行囊。若將遠行者然。有婦依其夫。女依其父者。悉有驚惶悽慘之色。婦女皆以黑紗蒙面。捷步趨行。不知何適。街衢間。僵尸斃馬。互相枕籍。尙未及收。有一犬死於馬旁。蓋於昨日。普法之兵。曾巷戰於此。麥蓮畢公爵。旅於城中。酒

樓。時出外巡閱。軍士盡額手致敬。麥蓮畢公爵。亦揭冠相慶勞。普軍衣履。皆極華整。似未經戰陳者。所有俘獲士卒。鎗礮輜重器械。幾如山積。於時有馬車輾轆聲。騎軍蹴踏聲。步兵疾走聲。將軍吹角聲。雜以民人喧惶聲。婦稚啼哭聲。群響畢作。不絕於耳者。竟夕。翼日。塵市間。鋪戶漸啓。普軍購物者紛如也。顧皆置辦寒衣者爲多。鋪人雖爲貿易。而其容皆似重有憂者。於是阿連郡城。仍爲普人所復駐守。設防焉。法京之軍。既不能破圍而出。應魯華河上之軍。又不能攻圍而入。援一戰之後。勢蹙情沮。普軍師毛奇。乃致書於法護國統領德祿蘇云。貴國魯華河上之軍。於昨戰於阿連。大爲奔北。其城仍爲我軍所據。特以奉聞。麾下若欲遣官前往偵探虛實。



當給文憑。準其往來。是書於十二月五日遞至。越日德祿蘇復書云。魯華河上援軍敗績。阿連郡中堅城破陷。具聞命矣。一切備悉。無勞諜使。法京護國廷臣。聯銜彙書。致於普軍師云。兵敗城失。音自敵來。雖欲盡信。亦不可得然。卽其事果真。而以法國之大。士馬之衆。豈無他處勁旅。勤王入衛者。堂堂法京。內可以守。外可以援。夫豈遽以此易我等素志哉。我等惟知出於戰而已。法國無疆民主之國。永靡有極。迨後魯華河上之兵。再敗於普軍師。毛奇復以書貽法京總統德祿蘇曰。君爲知兵名將。深曉戰守方略。何至今日。昧於自計。并昧於爲人計也。不知左右贊襄於君者。爲何如人。果可以大有爲耶。若其不然。法京中男女幼稚。不知凡幾。坐使戕其性

命。果誰之過。恐君必任其咎也。嗚呼。今何時哉。乃尙欲出於戰乎。勢已盡去。事無可望。想不必我之告君。而君已悉知矣。君盍善自爲謀焉。旋德祿蘇復書。盛謝普軍師厚誼隆情。但不及降意。十二月二日。普法又有亞田尼之戰。時普軍左翼。逐法兵出魯妙鄉。後向攬尼鄉。邁征翼晨已刻。郵報主筆之士。往遊其地。見衆善士遣馬車來載病卒者。紛如也。於時法兵甫欲整隊來攻普軍。普軍初意。法兵未必衆盛。及見其結陳布列。方知其多。主筆之士。遂入魯妙鄉。行未數十武。一望空闊。蓋戰場也。尸骸相枕。徧蔽道旁。皆前日所傷殞者也。昨夕天氣寒冷異常。霜華徧地。日曝不消。其地停有病卒之車數輛。霜滿其衣。拂之不去。其受傷之卒。多有氣未絕。而尙



能言者。主筆之士。行經其前。咸乞其作寄書郵。涕泣哀求。情殊可憫。士人慨然許之。頃刻間積至盈千。士人不能攜挈。乃取死卒所枕皮篋二貯之。戰場正在平原。一望靡際。行歷兩時許始竟。瞥聞礮聲環放不絕。響應山谷。知普郡王已於阿連左右。與法軍接戰矣。其地正可取道至法京。故郡王必以重兵邀截之。有普軍兩隊。數約三萬人。二十七隊及二十二隊分道並進。遙望之。刀光如雪。與日光相激射。朗耀刺目。再行稍近。見阿連城外有大平原。空曠平坦。其左卽亞田尼矣。普國挨耳伯王所統騎兵。卽屯於此。由亞田尼往阿連城外之路。於時正在用礮交轟。法兵之礮。不能及普軍。多落空際。計兩軍相距約四十雅。雅。雅英國語。每雅計英尺二尺四寸。是日天朗氣清。絕無纖翳。見法兵行向

阿連城。由漸退兵。是日已正。普郡王統第九隊兵。取道於沙顛龍滿的尼而進。其地在卑地威亞之南。普軍既至。法兵旋退。此二鄉遂爲普人所據。麥蓮畢公爵爲右翼。橫斷法軍歸路。巴華里亞兵接踵繼發。是日亭午。普人調騎兵以擊法軍。日耳曼兵縱火焚布斯里來鄉。是鄉當法軍之右。大抵兩軍相距殊遠。因有鑒於前日之戰也。前日兩軍既近。以短兵相接。路狹鬪迫。傷亡不下四五萬。是日。法軍戰既不利。遂退。普軍奮勇追襲。遂至多士鄉。日已西斜。法人乃用薩士鉢神鎗。回擊普軍。苦攻力拒。兩軍均以死命搏擊。時近曠黑。普軍亦不能再進。撤隊而回。其巴華厘亞之兵。攻法軍於蘇哇鄉。均以鎗隊相抵禦。俄而巴華厘亞兵萃於其左翼。普郡王亦



由正面擣其中堅。而麥蓮畢公爵從旁突出。翦其右翼。普軍三路齊發。聯爲長陳。環圍法兵之前。正如新月形。左爲蘇哇鄉。右爲布斯里來鄉。中爲西維里鄉。同時發礮轟攻。於時法兵皆互持甚苦。特用火器。猶未精。所放鎗礮。多落空際。不能傷普軍。以是普軍不得退。惟薩士鉢神鎗發甚迅速。其彈隨處飛於平原。易於著人。是晚普軍取西維里鄉。法軍散處於阿連城外村落。多潛藏於林樹中。然距阿連城尙遠也。普軍以夜深月黑。恐有法軍設伏。於西維里附近處。遂縱火焚其鄉。鄉中農家多積麥稈。相連如櫛比。以是延燃殆遍。火光燭霄漢。普軍之留於戰場者。大抵不下五萬人。皆在野露宿。宵寒風肅。多不能堪。其得藉稻稈麥稈作禦寒計者。已爲深

幸。行軍之苦。蓋如此。亞棉城既破。普軍攻圍魯現益急。城中糧絕援窮。萬分危急。而外援之兵。一敗於魯華河。再敗於阿連城。奔北死傷。士氣喪沮。於是法京始無望矣。阿連郡城既失。普軍密邇多亞。勢處危蹙。萬不能守。故法國廷臣。再議遷都以避其鋒。亞棉失守之後。普軍往攻那文地。西北一帶消息。皆不能通。法國大局愈危。事不可爲。法將巴羅前在士打拉士卜獻俘之列者。今違前約。復往魯華河上。統帶兵勇。以拒普軍。法之褒巴奇將軍。亦由蔑士出統兵臨陳。法將雕哥律。乃在師丹獻俘之列者。今亦背盟。再往法京。督率諸道兵士。衝鋒犯難。與普人爲勁敵。初師丹既降。法軍盡皆獻俘。當立獻城約時。諸將各簽名於約內。雕哥律將軍獨不可。普



人因令其攜率隨從諸員。乘車往般得毛臣。卽由其地附駕輪車赴日耳曼國作戰俘。既抵是處。適值輪車已將啓行。坐客已盈。無可位置。須俟一時許。他輪車至。然後可行。離哥律將軍。因乘機請於普官。往近村訪友。及至友人舍。易農夫裝束。乘田車。車中堆積薯果。納劍於其中。命前鋒牽馬先行。遂得脫。論者謂法國魯華河上雲集之兵。大抵不下三十萬。而卒莫能入援法京。以聯絡聲勢者。非力不逮。殆謀不足也。夫多寡者兵家之數。勝敗者兵家之事。以其數而遽定其事。固無是理也。况乎法兵雖衆。悉係新行招募。起自田里。未歷行伍。此無異於驅市人而戰也。法之精銳。一俘於師丹。再俘於蔑士。皆動以十數萬計。所有突將選鋒。至此蓋已盡矣。今

將見在。所有之數。與前日所俘之數合而統核之。則略可知矣。監步里兒將軍統兵三萬五千人。屯於窩士治。別將統兵九萬人。屯於卑辰干。機利地厘將軍統兵九萬人。屯於西境。褒巴奇將軍統兵四萬人。屯於北境。地喇鉢將軍統兵九萬人。屯於布來城相對之麻邑。此爲法軍之中路。巴刺顛將軍統兵二十八萬。屯於魯華河上。此爲法軍之北路。皆爲法京外援軍。統計六十二萬五千人。法京中兵士壯丁。約有五十餘萬。如是則法京內外之兵。殆且一百二十萬。豈小弱哉。奈何其終不能用也。至於自用兵時。及蔑士出獻日。擒獲法軍人數。可詳述焉。八月四日。威心勃之戰。俘八百人。六日。窩士之戰。俘四千人。七日。沙勃勒之戰。俘二千人。九日。律司士



田及力田畢之戰。俘八百人。十五日。蔑士外之戰。俘四千人。十六日。摩刺多之戰。俘二千人。三十日。蔑士外之戰。俘二萬人。九月一日。師丹外毛辰之戰。俘二萬八千人。二日。師丹納降。俘統兵官四千人。兵士八萬三千人。病卒一萬四千人。二十三日。多兒納欵獻城。俘二千三百四十人。二十五日。華西路之戰。俘三百人。二十七日。士打拉士卜出降。俘二萬人。三十日。法京外。俘三百人。十月十日。亞田尼納降。俘二千人。十六日。腮辰出獻。俘四千七百三十人。十七日。門地得之戰。俘一百八十二人。十八日。薩雕但納降。俘二千人。二十一日。法京外之戰。俘一百人。二十四日。士厘士德出獻。俘二千四百人。二十五日。安難之戰。俘一百九十五人。二十九日。蔑士

納降。俘十七萬三千人。以上所俘。統計三十有七萬一百六十。皆見於諸將文移中。其尙有文移中未及載者。不在此數。大抵不下四十萬。先是戰俘解往普國。旋分派日耳曼各邦。或使耕地。或使築臺。後因師丹之役。擒獲太多。無地可容。乃賃船載之。使之浮居。俟軍務既竣。遣回法國。按名計日。取償供給之費。嗚呼師丹之敗。法王諉咎於廷臣。蔑士之失。法人歸罪於巴彥。而法國大勢瓦解。尤莫甚於蔑士之一降。論者謂。麥馬韓果能力援。巴彥果能力守。則蔑士猶不至於遽失。乃援既不速。守又不固。遂使根本重地。拱手以授他人。而法京遂成孤立。是則麥馬韓與巴彥。均不得辭其咎焉。普王子郡王初置蔑士。不卽力攻。惟橫截之。使與法京不能援濟。



卒之法京坐困。蔑士終降。一舉兩得。莫過於此。謂非神於用兵哉。至其出奇制勝。俘敵之多。尤為歷來紀載之所未見。夫此被俘之軍。皆法國所謂驍騎也。多曾經歷行陳。樹立戰績。然皆不識地理。至有以普京在禮吳河東者。其謬已可概見。時或出師迷道。多詢之於鄉人。則於己國輿圖。亦且茫然矣。能勿至於敗哉。若夫普國將相之神武。兵士之猛鷲。久已名震於歐洲。曾於一千八百六十四年。克顛麥國。即暹國。粵所稱大黃旗國。越二年。又克奧地里國。戈鏃所指。捷報風行。則其所勝敵者。已不自法國始矣。

普法戰紀卷七

終

校合山田榮造

普法戰紀卷八

南海 張宗良 芝軒 口譯

吳郡 王 韜 紫詮 輯撰

普法自構兵以來。並以傾國之師。以決一戰。普雖有南北日耳曼之助。其兵數亦未必倍多於法。綜計普日軍士餘勇。約一百十二萬四千人。其在法境者。實六十五萬人。今為分核之。普國軍額。並北邦日耳曼兵士。計五十五萬人。礮一千二百尊。騎兵五萬三千人。此正兵也。其次餘勇十八萬七千人。礮二百三十四尊。騎兵一萬八千人。此餘兵也。又其次蘭華兵。即募勇二十萬五千人。馬一萬匹。此備兵也。共計兵勇九十四萬四千人。礮



一千六百八十尊。馬十九萬三千匹。普軍及北日耳曼兵馬器械之實數止於此。其在南日耳曼。所有兵士。各邦分統之。巴華厘亞邦正兵六萬九千人。礮一百九十二尊。馬一萬四千匹。餘勇二萬五千人。餘馬二千四百匹。蘭華兵卽募勇二萬二千人。戈添畢正兵二萬一千人。礮五十四尊。馬六千二百匹。餘勇六千五百人。蘭華兵卽募勇六千人。俾定邦正兵一萬六千人。礮五十四尊。餘勇四千人。蘭華兵卽募勇一千六百人。計兵勇十七萬二千一百名。礮三百尊。馬二萬二千六百匹。南日耳曼邦所有助戰之士馬火器。其實數止於此。說者謂普法兩國。並峙稱雄。其軍額本略相等。固非有衆寡之懸殊。勝負之敵。所不及料者。南北兩邦之前來助戰。

耳。普有助而法無援。然後厚薄強弱之情形不同。然北邦之必助普者。勢所當然。理有必至。夫固在法之意中。一千八百六十年。北日耳曼諸邦。聯盟立約。推普爲首。詎有普國稱兵。而反旁觀坐視者。惟南日耳曼諸邦。與普合兵之約。乃於構釁已後。新行釐訂者。此或法之所未及料也。顧其所助兵數。亦僅十有七萬。而以普攻法拒。主客之勢既分。勞逸之情迥異。法果能據險扼要。因利乘便。普之得志。當不至如是之甚也。說者又謂兵貴精。不貴多。此談兵家常語。亦要語也。但所謂不貴多者。非多之不足貴。乃徒多而不精者之不足貴也。若普兵則士馬旣衆。訓練亦強。兼兩者而有之。宜法之所以敗也。不知善戰者。勝負之數。初不繫於多寡間。試觀蔑士



之圍。法軍十七萬。普軍二十有一萬。而蔑士之巉巖險  
塹。可以當敵人十萬軍。而卒至於走。師丹之役。普軍雖  
倍於法。而法得地利。何難出奇以乘敵。而卒至於擒。此  
非徒恃於衆也。在乎用之善與不善耳。而普之足以制  
法死命者。則在於截麥馬韓於半道。陷巴彥於重圍也。  
當退兵師丹時。麥巴兩將相約。麥欲由沙龍繞道而來。  
援巴欲由蔑士內攻而出。應使麥若取道於門蔑地。疾  
行六日。可抵蔑士。固非普軍之所能襲。是計若成。普  
軍必至於首尾受敵。法之勝負。尙未可知。乃麥則阻於  
普王子。巴則扼於普郡王。一不能來。一不能出。遂至謀  
成畫餅。勢若崩崖。而後法不可爲矣。此其用兵之神。豈  
當於多寡間求之哉。况乎普或有人。尤能以少擊衆。以

寡制多。知勝負之數。益不繫於是矣。要之以多寡區勝  
負者。特其跡也。運用之妙。在乎一心。則其畧也。如謂多  
必可勝。寡必至敗。則袁曹官渡之戰。秦晉淝水之役。又  
當何如。而豈其然哉。近之右普而左法者。又以主客勞  
逸。爲普法辨。欲以文藉多勝少之跡。不知微論普兵非  
倍過於法。卽或過之。而善用兵者之取勝。豈在乎是。夫  
亦舍本而求末也已。普軍旣取亞棉城。卑倫呢波龍。正  
與之接壤。危蹙異常。多亞城亦洵懼。法將褒巴奇調統  
他軍。加厘波地敗於瓦枉河。機地利厘辭職不就。欲控  
內部大臣。監必得。法京中民人愁苦。糈糧將竭。氣候寒  
冷。絮纒無溫。艱難之狀。難以言罄。所有騎軍步卒。鎗隊  
礮兵。凡經平時所訓練者。悉爲普擒。鎗礮刀矛。器械衣



甲。鑄鼓帳幕。悉爲普獲。國中堅壘固砦。險堡雄堞。皆爲普所攻壞。卽如士打拉士卜。前爲名將。余烈所扼守。今爲普軍所下。蔑士天險。因圍出降。亞魯西亞士羅連兩郡。已爲普王所有。設官列戍。隸入版圖。京師現陷重圍。內無厚餉。外乏強援。時勢至此。尙復何望。法王幽居加些兒。已歷三月。普相俾思麥欲於將來議和之時。請其復辟。因法國中無人與之立約也。法王麾下之衆。如師丹之降卒。蔑士之俘兵。尙念國家。謳思故主。如巴彥麥馬韓。無不欲爭立擁戴功。藉普之力。再爲法王。則法王必德普之功。而普法之交必固。其和必能持久矣。有西國文士議普相之復立故王。爲非計。因法民固已不悅有法王也。夫法王旣爲群情所不附。卽使一旦懾於普

之威力。仍執朝權。則俟普兵一撤。必旋叛王。叛王卽無異於叛約。普於此將助王以攻民乎。抑從民以廢王乎。從民則何如。今日之不必立也。攻民則干戈之興。伊於何底。噫。是豈爲計之得哉。想普相當必不出此也。普人旣復取阿連。其地教士。令民潛攻普軍。因俟於田間。見普軍有二三人出行者。卽擊殺之。普軍聞之。怒甚。搜諸近村。凡鄉民之有持械者。不待詢問。立行開鎗轟斃。拘獲教士無數。將寘之法。阿連郡相近處。有仙鄉。有里摩鄉。普軍皆往緝擒。二鄉壯丁。責詬阿連郡民。因其知普軍將至。而不預告。以致普軍突至。攻之。所喪滋多也。自師丹失事以後。所有喪陷郡邑。不勝僂指。而其尤關於勝負之數者。則在士打拉士卜與蔑士也。按照法國軍



律。第二百九款謂。地方大員及守土官。有不能盡力守衛者。於法當斬。今法國廷臣。特遣人考察士打拉士卜及蔑士納降時情形。以視其能否盡力。然後定擬。十一月之杪。十二月初。外兵徵調已集。內兵演習已成。於是有法京城外之戰。魯華河上之戰。第各處郵報所述異詞。因備登之。以資省覽。十一月二十八日。魯華河上法軍。欲由寬丹布繞道。以援法京。普將因調第二第十路軍以拒之。轉戰至暮。大敗法兵。陳斬千人。生擒一千七百人。法兵遂退。二十九日。法將親統大隊。布陳於捫得基士卑地威亞左右。猝犯普郡王第十路軍。時普軍方據守攻下之地。建營屯筈。以俟新軍。法兵來攻敗之。陳擒數百人。普軍喪亡者亦千人。大礮一尊。爲法軍所

得。法褒巴奇統率第十九路法軍。三十日。魯華河上法軍。整隊啓行。以備決戰。蓋將遙爲法京外突圍之軍作聲援也。法將山打時督率第十六路兵。於二十九日。取道於花刺厘而進。猝遇普軍。戰兩時有半。兩軍漸逼。法兵持鎗刃。直前奮刺。普軍乃退。旋駐於羅尼薩離布厘。是日。普國丹將軍統巴華厘亞兵。與法人戰於阿連郡西。屢獲勝捷。有普國別將。與法兵戰於魯華河上。法兵敗北。陣亡七千人。普獲其大礮四尊。法兵紛然駭竄。麥蓮畢公爵擊退十五十六兩路法軍於羅尼。旋又敗之於亞田尼。獲大礮十一尊。俘法兵數百人。十一月三十日。十二月一日。普法兩軍。疊戰於魯華河上。法國森士將軍。陳傷被擒。所有第十七路軍潰焉。時普軍繼至者



雲集。法兵乃退扼阿連之隘口。普軍屯於卑地威亞亞田尼阿遮柿。是日之戰。法軍被擒者三千。喪大礮七十尊。普軍之亡於陳者亦極多。普國蠻雕飛將軍奉命統師往法京北境。堵扼要害。以防法兵突趨法京也。時普人遣蠻雕

飛將軍屯於法京之北。郡王麥蓮畢公爵屯於魯華河法京之南。

麥蓮畢公爵奪據阿連城外輪車

鐵路。扼法軍往來要衝。獲礮三十尊。俘兵一千人。遂薄阿連郡城。於是普軍聲勢益振。法人遠近震驚。普郡王麥蓮畢公爵既獲大捷。遂襲法兵於阿連。法兵棄城而遁。被俘者一萬五千人。法國總理內部大臣幾陷於普軍中。變服易騎。始得脫。北方法兵為蠻雕飛所敗。退走魯現。時是城已為蠻雕飛所取。統日耳曼軍先至。據守其地。其在南方之法兵。欲渡魯華河者。亦竟不得過。法

將巴刺顛遁入威亞辰。卷甲束馬。逕趨瓦華。有別枝普軍在法國西境者。出襲其後。逐北追奔。不遺餘力。普兵專向瓦華進發。絡繹不絕於道。時法之俾路佛城已為普軍大礮所轟。勢甚危迫。普人又敗南方之法軍於美庸。俘兵一百九十人。獲礮二尊。法國廷臣以寇勢日深。定意由多亞遷波茶為新都。監必得仍留於法京。普軍將攻沙畢。日耳曼兵自雕鼻退出。法軍屯於布來士城相近處。普人擊之。紛然退走。普人遂先據城旁扼之。法軍乃奔。普人奮逐之。不得及。十一月八日。法軍三路並集。驟與普軍擄戰。麥蓮畢公爵馳赴攻之。法兵敗績。被擒者一萬。十日。普郡王麾下將士往攻威亞辰。大勝。法軍遂據其地。十一日。普軍屯於魯華河上。法兵以大



隊來攻。普軍擊退之。旋圍瓦華。普軍進攻卑路佛。獲捷。日耳曼第三路軍。向波治。過征魯華河上餘勇。法人命餐士將軍統之。出與麥蓮畢公爵戰。苦鬪三日。多亞城聞之。撥遣大隊來援。普軍志氣愈壯。居前列者。猛銳向前。卒勝法軍。法將餐士知魯華河上營壘。勢不能守。撤隊退師。普軍襲之。遂分竄於多亞城布來士城。瓦華旋為普軍所據。以重兵屯其左右。自八日普軍攻陷標賤士。十二日。下科士北。十三日。取布來士。入門蔑地。法京外要隘盡失。魯華河上之軍。其勢渙潰。外援遂絕。以上皆係追述十一月二十八日。法京兵勇。分數路並出。馳擊普軍。相持竟日。法軍據腮士依罷尼。旋為普軍所擊退。法軍被擒者一千六百人。法國北軍奔往亞拉。普兵死

法國魯華河上之新兵

者一百人。陳亡總兵官七人。是夕。城外諸礮臺。施放不絕聲。翼晨。法軍又復傾隊而出。更於蠻河仙河間。用根砵礮艇。以助戰。根砵英國語也。譯即載礮小艇也。三十日。普法兩軍大戰於法京外東北隅。法將雕哥律統眾十有五萬。欲取道於寬丹布。以與魯華河上之兵相接。時普軍屯於蠻河仙河之間。以杜塞法軍出路。日未亭午。兩軍搏戰甚苦。法之第一第二路軍。旋為普之第六路軍所敗。普人又調南邦戈添畢兵。北邦塞慎尼兵。分為左右兩翼。而出相持。至酉刻。遂勝法軍。法軍受傷被獲者甚多。普軍因藉土壘庇身。喪亡較少於法人。於是停兵數刻。以殮埋畢命疆場之士。雕哥律誓於師曰。今者事危勢迫。非冒死力戰。背城借一。不足以少紓此難矣。男兒當死於疆場間。以



馬革裹尸耳。豈甘局促於圍城哉。所有珊璧尼村布禮村。皆我法京外之門戶也。苟不得此。誓不返矣。汝衆其勗之。遂驅率衆軍。駕橋以渡蠻河。明日。遂克珊璧尼村。布禮村。更至布里沙蠻威刺沙蠻等處。幾與魯華河上之兵。聲勢遙應。十二月二日。普法兩軍又戰於城外。法人據守礮臺。環轟迭放。以攻普軍。普人亦於魯尼礮臺。挪全礮臺。還擊之。戰至數時。法人奔北。兩軍皆有喪亡。是日。普國亞巴尼將軍。統率戈添畢第一枝兵。普第二路軍。塞慎尼第二十四隊兵。往攻珊璧尼村布禮村。法兵奮勇迎拒。由晨至暮。力戰不息。已據珊璧尼村之半。普軍喪者殊多。戈添畢兵死傷八百人。陳亡統兵官三十人。法將雕哥律自斷往趨阿連之橋。退入蠻河。旋即

率軍而回。渡河既畢。盡毀其橋。退入法京。於是圍城兵勇銳氣盡墮。而內勢愈孤。以上皆追述法京出戰之兵。自此法國廷臣監

必得。遂有求暫息兵之想矣。十二月一日。普之巴華里亞兵。屯於阿嘉鄉。是鄉距眞威厘城約三十里許。法軍知之。整隊來攻。申刻馳抵其境。普人布陳以待。兩軍甫接。法兵頗得利。逐巴華厘亞第一枝兵。退出境外。俄而巴華厘亞兩枝兵。自後迭至。夾擊法軍。退去之兵。復回相助。互持至暮。法人大敗。翼日清晨。兩軍復出決戰。有一主筆之士。往觀焉。行抵巴蘇治。時正見兩軍併力角拒。旌旗蟠地。鎗礮震天。觀之不覺神爲之王。戰至亭午。法軍少卻。巴華厘亞兵。馳驟逐之。頃之。普軍中礮隊步卒。由漸而退。因藥彈已竭。至營往取也。俄而大聲忽震。



谷應山鳴。則普軍礮隊復進也。法人不能支。多退入朗尼鄉。隱於屋後以蔽身。而潛以鎗擊普軍。距此鄉一里半許。有一小村落。法軍餘勇所聚。見普軍來逼。群出助戰。普法兩軍復大戰於朗尼鄉。旋進旋卻。勝負未分。普國亞路拔王子親率騎隊而至。以攻法軍之左翼。普之間。詩田兵復自旁出以攻法軍之右翼。三路環圍。併力合擊。法軍大奔。退走餘勇所聚小村。普人從之。法兵乃依餘勇所築土壘。以拒普軍。於是兩軍再戰。普軍無不以一當十。卒取小村。而盡驅法軍於村外。既畢戰。卽有法軍大隊來援。但其至已遲。兩軍俱已撤隊歸營矣。主筆之士。隨於普軍之後而行。但步步稽延。苦不得速。因戰場中陳傷兵勇。哀呼籲救者。不一而足。行抵一處。見

法兵二十人。偃臥於一丁方地。呻吟痛楚之聲。耳不忍聞。俄見好善之士。驅車而至。或爲之裹創洗傷。或爲之敷藥治損。故一時感歎之聲。又復不絕於道。是日亭午。朗尼鄉爲普軍所焚燬。普法交戰處。其左近亞田尼城。普軍之數。大抵不下三萬。第二十二枝爲域的兵。第十五枝爲地厘士求兵。相距一里半許。爲巴華厘亞兵。麥蓮畢公爵。美甯尖公爵爲左翼。丹將軍爲右翼。當始合戰時。法軍人人。猛厲無前。其卒至於敗者。以不能持久故也。是日日西落後。天氣頗寒。肅受傷者。幾至於血凝氣滯。多不能救。有一飛彈。過洞丹將軍之革鞞。然足無所傷。蓋有天幸也。十二月九日。有標賤士之戰。先是普法兩軍。於此迭戰三日。苦攻力拒。各不肯止。以是血流



若決渠。尸積若累邱。九日清晨。有郵報主筆之士。聞而往觀。未抵其處。已聞鎗礮之聲。崩山摧岳。於途遇有普國官弁。知普軍於昨日已攻據美沙鄉。普國第十三隊間詩田軍。卽結營於鄉後。在美沙之前。爲華挪鄉。尙有法軍屯筍。夜半。普軍潛約進師。銜枚疾趨。乘法軍之無備也。而襲之。俘獲法軍四百人。巴華厘亞兵。亦於是晚由標間鄉出。突擊法軍。攻據里迷鄉。然法軍雖屢經敗北。而意氣尙壯。主筆之士。行近戰場。見第十七隊普軍。布陳於標賤士東。爲左翼。有別路普軍。整隊於華挪之西。爲右翼。右翼之外。排列騎兵。以備衝突。其處多葡萄園。紅紫彌望。馬隊之外。卽威勞蘇鄉。鄉中有大會堂一所。高聳偉麗。甚壯觀瞻。此卽法人於昨日以巨礮轟攻

普軍處也。於時巴華厘亞兵。逐法軍。至於是鄉。旋又逐之。至威利租晏鄉。法軍右翼之外。爲克利溫鄉。昨夕。已爲二十二隊普軍所踞守。普軍萃於法軍左翼。力攻不捨。左翼之外。爲取道往馬尖尼大路。蓋是日法人駐軍之地。卽昨日普兵列陳所也。普法兩軍奮死角戰。法軍雖衆。究爲普人所敗。以新募之衆。尙未嫻於節制。而爲將者。亦復不善於用兵也。昨日戰罷。法人所據。甚得地利。普軍料其必復來攻。而法軍漫不加警。斥埃甚疏。刁斗不設。故普軍得於夜間伺其不虞而擒之。是日戰至亭午。普國第十七路軍。進攻對面村落。第二十二隊軍。偕巴華厘亞兵。進攻駐筍沙尼鄉之法軍。是鄉之後。卽克利溫鄉。普軍屯焉。於是法軍退走馬尖尼。普人自後



逐之不及始止。是役也。兩軍喪亡無算。八日之戰。麥蓮畢公爵敗法軍三路。俘兵千人。獲礮六尊。十日之戰。麥蓮畢公爵遂下標賤士城。俘法兵一萬五千人。奪獲大礮七尊。是時魯華河上法軍。雖屢北。而論者頗稱巴刺顛爲能軍。猶加褒美。因其於七十日間。招集壯丁。至於三十萬。雖轉戰之餘。屢至奔北。而意氣慷慨。不致沮撓。亦足尙矣。且於是月初旬。迭戰七日。雖敗猶勝於不戰而走者。千百倍也。十二月十日。法國朝廷。由多亞城遷於波茶。九日已刻。普國漁蘭兵。攻據都叟城。數日前。普軍猶未臨其境。土人聞其將至。震驚特甚。皆思外徙。旋普軍入城。城中人見其軍容整肅。於民無犯。乃始相安。普軍所索。民間供俸者。惟酒烟而已。十一日晨。普軍卽

自拔營出城。望法京而進。普人取法之雕鼻飛禽兩邑。駐軍鎮守。按此兩邑瀕於海濱。亦爲通商要地。今爲普軍所取。則由外載來之火器。無從接濟。而法益形掣肘矣。十二日。普人取科士北。蓋由於獻城納款也。初普軍於八月九日。圍科士北城。逾夕用礮轟攻。約兩刻許。卽止。法軍之守茲土者。額兵一千人。壯丁八百人。普軍往攻者。步卒五千人。礮軍一旗。巴華厘亞兵一隊。普國統兵官爲加士多父將軍。科士北城小而堅。附堞礮臺。雄壯鞏固。普軍舉礮轟攻之時。所發礮彈至三千餘顆。而礮臺無所損。絕不震動。僅焚燬旁屋一椽而已。十四日。普軍再攻之。自旦迄暮。鉛丸如雨。烈燄橫飛。延燒屋廬四十家。其毀圮者二百五十家。十一月二十四日。環圍



已久。而城中兵民。仍無降意。乃復攻之。至是以糧匱援絕。迫於無可如何。遂詣普營。獻城納款。城中自十日始。已宰馬爲糧。凡鹽糖加非烟酒等物。均已罄絕。顧尙有穀米。乃煮粥以充飢。嗣亦并絕。境內民人四千。普軍在外斷其汲道。源泉俱涸。法之守城官。於此時不獨撫養士卒。且當安輯人民。城中尙有鎗一萬二千桿。皆係新式製造。每桿八百輪。旋轉納彈。極爲神速。存火藥數千斤。守禦巨礮數十尊。當啓門出降時。守城官預命其下。毀鎗輪機。壞礮火門。而沉火藥於水。曰無以資敵用也。或謂城中之所以無糧者。蓋當法王兵敗於蔑士時。麥馬韓退走。是城。城中所有糧儲。悉攜以去。至是遂難以久守云。普軍於十三日。入城據守。普國自以第二路軍

復取阿連之後。逐法軍踰魯華河。法軍於是建營於得嬌沙厘旃邑。皆阿連東境也。普郡王特遣第三路軍。往攻之。後又聞法軍大隊。屯於標賤士。此蓋在阿連西境也。郡王更撥第八路軍。往攻之。旋調第六隊騎兵。往阿連之南威亞辰境上。乘法人退兵。突出擊之。郡王預料法兵一敗。必退走多亞城。故留第十路軍。守衛阿連。以便指揮軍士前往各處。襲攻法軍也。此爲往魯華河左之兵。又遣麥蓮畢公爵所統十七隊二十二隊之兵。及巴華厘亞兵。往屯魯華河右。當普軍進發時。第三路軍沿途所遇法兵甚寡。不過零隊餘衆耳。騎兵遵道趨行。亦無所阻。惟土人頗多滋索。十二月七日。麥蓮畢公爵飛書達於普郡王。知標賤士左右。果有法國大軍屯駐。



以扼普軍之進。蓋不使其再入南境也。是日。法將山時  
統率十六十七二十一一路法軍。來攻麥蓮畢公爵。戰鬪  
移時。兩各罷兵。十二月八日。復出決戰。爲普所擊退。十  
二月九日。郡王旣得書。遣第十路普軍助戰。至時。兩軍  
鬪正酣。乃大呼從旁馳出擊之。更佐之以礮隊。法軍遂  
奔。兩日之戰。公爵麾下所統。喪亡殊衆。郡王旣遣第十  
路普軍。行慮法兵衆盛。一時恐不得勝。復命第九路軍。  
預備以待。急則馳援。十二月十日。第九路軍。亦往合力  
奮擊。大敗法軍。法軍退往布來城之西南境。郡王調第  
三路軍。由旃邑回屯於標賤士。當阿連之南。遣第十路  
軍。乘勝往攻布來城。留第九路軍屯於魯華河左。十二  
月十一日。郡王移大營出阿連。十二日。駐於標賤士。十

三日。駐於沙孚。十七日。始拔營離彼。十三日。普將福烈  
士。統第十路軍。攻據布來城。法軍自十二日戰後。退往  
雲耽。十五日。麥蓮畢公爵兵。至摩厘。其地在雲耽之北。  
突遇法軍。親與搏戰。勝之。普將福烈士。由布來城外追  
襲法軍。以礮攻其後隊。初。郡王慮法軍北上。往援法京。  
故使第二路軍扼於要隘。以止其進。十七日。又命第十  
路軍。馳赴雲耽。與筈在魯華河。第九路軍。筈在標賤士。  
第三路軍。相合併力。以攻法軍。俾不得向法京而行。時  
雲耽守城者。乃法國廷臣。監必得也。於十六日夕間。召  
麾下將士集議。皆以雲耽決不可守。不如暫避他城。因  
定計。於翼日。退駐里蠻。十七日晨。法軍駕橋渡魯華河。  
而南。旣渡。忘毀其橋。故普國追軍得以乘之。徑渡。始渡



河者。爲第十路軍。麥蓮畢公爵所統者也。故卽受命西馳逐攻法軍。以絕其入京之路。普國第二路軍。又於法國南境外。逐法軍往西境。令其不得近法京。巴華厘亞兵留守在旃邑者。爲法軍所攻。甚急。郡王聞之。遂於十七日十八日。迭遣精騎往助。兼以鎮守法京南境。十八日。郡王移大營往美庸。十九日。回阿連城。當普軍之入雲耽也。得法臣監必得檄諭一紙。傳示各郡邑地方官。凡有法兵離隊向後。冀圖乘間逸去者。卽擒勿緩。以是時法人之不欲從軍者衆也。是役也。普法兩軍大戰於標賤士。自十二月六日始至九日止。當其苦鬪時。勢傾山岳。色變風雲。亦可與蔑士師丹相髣髴云。十二月十二日。普軍攻捫蔑地。其地在師丹之南。議者謂科士北

旣降。捫蔑地俾路佛陷於重圍。勢處危迫。哈佛旦夕震驚。不得自保。法之大勢已去矣。魯華河上新集之衆。步卒三十萬。騎兵一萬五千。大礮千尊。可謂厚集其陳。盛張其勢矣。而悉爲普人所敗。德祿蘇雕哥律。京外之戰。相持三四日。統衆十五萬。可謂能作其威。能奮其怒矣。而卒不能出雷池一步。巴刺顛雖復阿連。而終至失守。事至此極。尙奚望哉。新遷之都。建置無常。一遷於多亞。而再遷於波茶。如奕碁焉。如是冀其不蹶得乎。或又曰。自法軍之敗於阿連也。作翼折復張之勢。區軍爲二。褒巴奇將軍統一軍。往旃城波周士尼華山。時將軍統一軍。往布來多亞。後屢爲普軍所敗。退走標賤士。旋退於雲耽。旋又退於里蠻。每一軍皆不下十餘萬二十萬人。



非不衆也。力非不足也。但徒事債張。不經持久。故卒爲普郡王麥蓮畢公爵所覆敗。褒巴奇大營屯於波周士。後以大利將加厘波地。馳往南士俾兒佛。欲截普軍歸路。而並斷其糧食。夫此二者。皆爲軍行生死之所繫。固未易於得志。况乎善用兵者。尤於此致意者哉。故法人於是役也。卒爲普國窩得將軍所制。論者謂統觀法軍大勢。褒巴奇宜取道由旃城往捫他芝。由捫他芝往寬丹布。以援法京。如此猶不失師行之要着。而奈何其見不及此也。惜哉。十二月十二日。普軍退出都魯士邑。往華西路及薩得城。十三日。普軍取布來城。十四日。普人下捫蔑地。初。普人以重兵圍捫蔑地。晝夜環攻。勢已垂危。至是乃獻城納款。俘兵三千。獲礮六十五尊。破城之

日。釋出法所擒日耳曼兵二百三十七人。是日麥蓮畢公爵攻據扶里羅村。十六日。仍爲法兵所復。是日法京以氣毬遞致消息。備言法京人民定意與普相拒。十七日。普法兩軍接戰於標棉。其地在伊路士之西。攻拒未幾。法兵卻走。普人遂據標棉。陳擒法兵三千。獲礮六十五尊。十八日。普軍攻狼紐。其地在蘭克厘左右。法軍據險以爭。轉戰移時。法軍敗績。普人盡奪其隘口。驅之入礮臺。是役也。普軍僅二萬四千人。既獲大捷。遂於翼日進攻多亞城。法京自十二月二日決戰之後。閉城不出。兩軍各自堅守壁壘。內外礮臺均寂無聲。監必得欲求暫息兵。以便選人至國會議事。先令發孚出京言和。旋卒不果。反曰。此從局外諸國所請耳。非法廷意也。普言。



法國不遵魯心勃兩不偏助之義。有背前約。蓋因魯心勃有意助法也。普相言助法之故有四。一魯心勃居民其心愛法。樂爲之助。已形於外。而朝廷亦明知其潛援。置之不問。二購運食物。至泰安威兒。暗爲接濟。朝廷並不加以禁阻。三法國官員已在獻俘之列者。皆從其地。逸回本國。從不加以阻截。四凡獻俘人員。出其境者。反爲之設法圖維。令其得以逸歸。如是則魯心勃無異於在局內矣。因移文於英國及巴刺斯魯心勃。共議其事。秉公籌酌。按魯心勃一名盧森堡。又名碌森卜。皆音相近也。因與荷蘭連境。遂隸入荷蘭版圖。然實不屬荷蘭。而屬日。公會由日遴選公爵大員爲君。統攝其地。疆宇方八千二百七十八里有奇。人民十九萬五千二百八人。首邑曰碌森巴

克。戶口之數約一萬三千一百七十人。其君與歐洲列國互結盟誓。別爲一邦。顧魯心勃雖蕞爾彈丸。而於一千八百六十七年。英俄法普荷五國。在英京倫敦立約。共相保持。其蒞盟之詞曰。無以強凌弱。無以衆暴寡。無以大脅小。有一於此。衆共攻之。以是魯心勃藉諸大國之衛。得以有恃而無恐。十二月十九日。英國廷臣集議魯心勃事。皆言普國所云。乃得自傳聞耳。未足爲據也。可各釋疑。勿以此啓爭。時俄國方議改黑海之盟。盟在二千八百五十八年。與英法土或謂蓋由普相播煽其間。英人因言此事亦與相類。十二月十四日。普相移文於普之駐筭各國公使云。法人食言背信。不守約詞。既降之後。仍回法國。從事戎行。法之所以蹶者。皆由任用小人所致耳。盡以



若輩使之將兵。雖欲不敗得乎。是月中有英國帆船六艘。駛入仙河。船中貯煤往魯現。蓋以濟法軍之不足也。爲普人所見。卽舉大礮轟沉之。六艘無片板返者。人亦盡溺水中。普人以英之私售鎗礮與法也。移書責之。與之反覆辨論。先是九月十月間。普相俾思麥。已屢有詞。而英國置不省也。英京郵報云。美國近亦售鎗礮與法。非獨英爲然也。何普獨英是責哉。又謂普相一聞樂聲。卽已手足忡舞。蓋喻普相偶獲一消息。立卽刊諸日報。以聳動國中人心。曰。此英國之不善也。使其蓄志以攻英。又責普相譎甚。欲乘英美之不和。時美國方以亞拉巴麻之款與英爭難。蓋卽昔年南北花旗之戰。英曾製備戰艦。助南以攻北也。而亦藉此爲詞。以爲後日啓釁地。駐英之普國公使。偵知英法以火器相授受。因潛察英京鋪局中。

所有鎗礮。於每日間。製造若干。出售若干。悉簿錄之。更以術取致其貿易約契。曰。此可爲據矣。十月十四日。普國有書致英。由普駐英公使轉呈。其略云。敝邦自與法構兵以來。貴國商人販鬻火器與法者。幾於無日不有。邇來更多於往時。自八月晦迄今。何啻四倍。法國首相明言於衆中。已在英國售鎗四萬桿。此猶前日事也。今則更不知其凡幾。於倫敦及俾明痕。大開冶局。爐火燭天。匠役操作。晝夜不息。所有交易約契。我盡得之。昨獲法國兵部文移。知於九月十八日。購成士乃打新鎗二萬五千桿。鎗值卽由法國駐英公使呈繳。貴國所爲如此。揆諸萬國公法。實有未合。按萬國公法二十四款。火藥軍器。列於第一等犯禁例中。局外之國。無得售於局



內之國。苟其私相接濟。使戰爭之事曠日經時。則必咎有所歸。是則禁止之例。勢在必行。惟貴國其圖之。英國統理外部事務大臣云。英國之例。未有是也。軍器出售。無關禁止。諸國律師。亦未嘗議及。是以英國並不刪除是條耳。請於事後思之。卽知其無足繫於重輕矣。法國許遣使往議黑海事。命發孚出京。旋以普相不給路憑。乃旋。按黑海之欸。初立於法京巴黎斯。向固推法人爲領袖者也。故法國廷臣。推選發孚前往。以發孚職爲統理外部大臣。分所宜預。義無可辭也。時將出法都。見普相俾思麥。請給路憑。且告之故。俾思麥復書不許。且曰。路憑之給。原以便出入。雖以敵人有事出外。例可得予。但取之於將士。則可勿問。取之於我。則必詰其所由。如

但乞路憑。而不告我以何事。則我猶可給也。今乃直告我以黑海之事。我雖欲畀豈能得乎。如我給之。則法廷伊誰爲主。乃欲我從而認之乎。若俄國之事。可議。普國之事。亦可議矣。夫法今日之事。孰有急於與普議和者。乃置此而不論。反俄事之是預。置輕而從重。舍急而就緩。非普之所許也。不能給路憑。職是之故。幸恕而察之。書復不旣。觀此則普相之命意。雖嚴而措詞則緩矣。普人患法軍之有外來接濟也。思有以杜遏之。故普軍師毛奇議取瓦華雕鼻飛禽三邑。皆法國瀕海要所也。軍需軍械。悉從此入。普得此地。無異於扼法國之吭矣。不獨此也。普軍一切供給。卽可自行采購。取辦於是。不必遠從其國運至。法人知之。咸曰。是地在所必爭。立遣水



師。駕戰艦。前往鎮守三處海口。以截其出入。法國朝廷。檄諭各郡。遴選十五旗十隊壯丁。以禦敵軍。普軍師毛奇。調日耳曼新兵至法。助攻法京。所至藥彈器械無數。屯積法京外。不日當決大戰。法國北軍。尙爲普將蠻雕飛所追襲。普軍二萬四千人。往攻紐邑。其地在棣群左右。法兵遂出與戰。相持兩時許。普軍勝之。遂據其地。翼日薄暮。法軍驟至。普人不虞其來。未爲設備。卽離城出屯。遂爲法兵克復。是晚。普軍大整隊伍。進擊法兵。時昏黑倉猝之中。未審敵衆多寡。法兵拔營退走。時十二月十有八日也。或云。是役也。與法普戰者。普第一枝第二枝。巴甸兵也。普國巴甸王子威林。將軍克連摩。分統之法軍爲新壯丁二枝。一卽第三十二枝。一卽第五十七枝。

枝。法國克藍麻將軍將之。其數約不下二萬。陳始合。法兵縱橫盪決。所向無前。巴甸王子克連摩將軍。咸被傷。然普軍中饒吹聲益厲。人人踴躍赴戰。遂敗法軍。普之統兵官。陳亡者十三人。傷者二十九人。普兵死者約七百人。法國統兵官喪亡亦衆。陳亡兵士。亦不下千人。其爲普所擒者。統兵官十六人。兵勇七百人。普兵之屯守魯華河上者。區爲二軍。左翼向多亞城。迺征。右翼逐法軍於里蠻城外。當亞連里蠻相間處。被傷法軍約有六千餘人。沿途匍匐。委頓萬狀。率無人爲之調治。有郵報主筆之士。隨法軍觀戰者。行抵阿頓城外。致書郵局云。值茲天寒地凍。霜雪載塗。法軍征衣單薄。無挾纊者。其臥具並無氈褥布幕。風嚴其苦殊甚。是以多至疾病云。



法國山時將軍統率魯華河上新兵。爲普軍所攻。屢戰屢北。遂退屯於雲耽。旋又退駐於里蠻城外鄉落間。褒巴奇將軍所督魯華河上法軍既敗。後亦退往波治河濱。普郡王麥蓮畢公爵。旋逐山時將軍入里蠻城。普王自攻法以來。屢奏大捷。威名遠播。功德日隆。臣民皆擬奉以尊號。連章勸進。普王謙讓弗遑。至再至三。日耳曼列邦皆與普國聯盟一體。而推普王爲盟主。咸以普王壽高望重。疊建偉功。非上徽號。不足以致尊崇。凡南北二十六邦。皆聯名上書於普王。於是普王俯順各邦人心。勉徇所請。期於十二月十有八日。舉行大典。日人之旅於外者。一聞是耗。無不飛書相賀。普王年逾古稀。精神矍鑠。每日必乘騎環行營伍。撫綏士卒。雖久於鞍馬。

之際。不以爲勞也。二十六邦中。巴華厘亞王最先效命。以其爲南日耳曼諸邦之長也。先是巴王英年嗣位。不欲輕以兵權授人。至是感普相俛思麥。利害相顧。緩急相維之說。乃一意推普。其上普王書曰。自南北日耳曼諸邦。聯爲一體。咸願總統於大王。以一政權。惟大王德威遠暨。聲施爛然。允宜爲諸邦長。鄙意諸邦必有所統攝。然後能利溥益廣。垂盛大於無窮。夫以盟主之權。聯絡諸邦之聲勢。以祖國之名。兼轄南北之版圖。非稱帝以臨之。不爲功。敝國竊願執梃爲諸王先。伏惟大王俯允所請。以洽輿情。以收衆望。永擴丕基。奕世無疆。不勝悽悽之誠。謹奉表以聞。旋巴王致書塞慎尼王。請其合詞勸進。以成盛舉。其書曰。惟我日耳曼諸邦。歷來皆一



語言同風俗。齊藝術。以至政刑軍旅。講武備邊。均無異制。然終不能卓越於歐洲。雄強於西土者。何哉。以其勢分而力渙也。今隨普國英主以出征。遂能戰無不勝。攻無不取。走強敵。破名都。爲自古所未有。益知諸邦相合之利。爲無窮矣。不穀向嘗有志。欲日耳曼南北相聯。維繫若一體。已與普相籌商。冀符所望。傳檄諸邦。承風遙集。想大王亦有意焉。今當同請於普王。求其改尊稱踐大寶。以爲諸邦長。不穀不自揣量。願首從事於此。諸邦之意。雖未深知。當無不歡然允納。惟大王俯鑒鄙衷。共圖斯舉。不勝區區友愛之忱。奉瀆清聽。於是南北二十六邦。一德同心。推戴普國。共議繼自今。於昇平時。所頒於民者。同一政事律例。於征伐時。所行於兵者。同一號

令甲仗。整齊而畫一之。無所偏頗。初各國已公輸麥刺一百二十兆。以供軍需。然猶不足用。今復捐麥刺一百兆。撥解普王大營。越數日。日耳曼諸邦。同上書於普王。遣臣賈至華西路大營。當繕草之時。集衆議於朝。諸臣中以爲可者。一百九十一人。其否者僅六人而已。其書曰。前承大王命。凡我國壯丁騎士。咸得分統於貴國將軍麾下。合而爲一。有如身之使臂。臂之使指。以衛保我宗邦。惟我宗邦常爲敵國所憑凌。強鄰所侵伐。此一役也。器械損敝。軍士死亡。無不深爲痛惜。但我各國人心。俱臻寧謐。無至震驚。乘屢勝之餘威。復前時之故土。在此舉也。苟我國家不得取鞏固之疆宇。爲永久之屏藩。以捍禦強鄰。而制其攻擊。則斷不肯釋甲弛弓。與之息



戰敬謝。大王憑仗聲威。獲此克捷。嗣是以後。南北日耳曼。異口同詞。齊心一德。請於大王。進稱帝號。冠諸邦而立極。首群辟以稱宗。俾日耳曼由分而再合。集眾以歸一。所以自主自固之權在此。所以致富致強之基亦在此。敬謝。大王親統雄師。躬摧強敵。櫛沐風雨。馳驟疆場。其勞甚矣。我儕眾人。曷敢或忘。惟大王能以干戈致玉帛。能以戰鬪享昇平。智能神武。曠世無儔。帝於日耳曼國中。為之總統。有戰則克。惟德惟威。興隆和洽。與國無疆。賈書廷臣三十二員。十二月十三日。由普京伯靈啓行。十七日。行抵法國華西路。普王大營。謁見普王。請稱帝號。十八日午正。普王受朝賀於法國行宮。是宮法先王路易第十四所建。用以備遊幸者也。是日預班列者。

威瑪邦王爵。麥蓮畢邦王爵。戈添畢邦王爵。巴定邦公爵。普王子。首相俾思麥。軍師毛奇。大小文武臣工。咸在。駕行鷺序。肅穆趨蹌。皆免冠額手頌賀。禪臣立於眾中。宣讀廷臣所進書詞。既畢。普王乃言曰。今日者。抑強邦。聯與國。繫非諸臣之力。不至此。敬謝諸君。張吾國體。不穀初承巴華厘亞王勸進之書。竦荷交集。懼難以稱。夫此舉動所關綦巨。藐躬自顧。曷克凜承。但群情所附。卽眾望所歸。欣冀之私。豈能盡拂。不穀惟有上承天命。下洽人心。答諸邦之嘉惠而已。欽哉。惟休。永矢勿諼。旋頒詔誥。諭將士曰。自今日始。不穀勉狗臣民之請。敬受徽稱。由王位而尊至帝位。日耳曼列邦。同聲推戴。繼自今列邦人民。聯為一體。凡我同宗。咸不忘爾眾之勇毅。堅



忍。曷勝嘉悅於汝躬。列邦之同心一德。由茲而致。是役也。賴億萬衆。捐軀流血。方克建此奇勳。不穀曷敢忘爾功。有戰必克。致國於強。所以成此丕基。洽於一心。惟汝桓桓猛鷲。從命弗貳。我國家因以榮盛無疆。鞏固永久。欽哉汝衆勉之。禪臣於一千八百四十九年。立富列得威林第四爲王。今又立威林第一爲普帝。士庶榮之。是日。普營將士。環列殿外。旗幟耀天。金鼓震地。樹普國大纛於殿巔。有法人供役於外者。竊竊偶語曰。普王自此遂稱帝乎。彼以何功德而致此。一法人曰。阿擺任彼爲之何害。我亦冀其歡樂耳。彼如此庶幾善視法民乎。非然彼今日若何待我。則我於將來亦若何待彼。出爾反爾。固理之常。又奚足怪。阿擺法國語。卽華言墮落之意。

十月二十日。法京將士出戰不利。兒心畢紳民四萬二千七百七十三人。聯名具稟其地公爵。求其速救國難。至於獻地求和之舉。苟衆志未從。斷不可輕以畀人。法京外礮臺。連夕轟擊不絕聲。蓋防普軍之潛襲也。麥連畢公爵。向多亞城里蠻城進兵。十二月二十日。法國俾山尼將軍。統兵六千。駕礮六尊。戰普軍於蠻尼。其地在多亞城外。時普兵一萬二千人。衆殆倍之。二十一日。普軍抵多亞城下。以飛礮攻入城中。守陣之卒。多有死者。城中乃樹降幟。守城官求普軍勿再施礮。開關以延普人。普軍不入。因聞其有奇謀也。旋返布來城暫駐。惟城外輪車鐵路。已盡爲普軍所毀斷。魯現左右。普軍已自撤退。法京將士定議。於二十一日決戰。法國雕哥律將



軍據守華刺連隘口。威來將軍據守威刺厘依負拉。二十三日。法京中聞城外礮聲頗震。疑北軍之來援者。已逼普人大營。遂各整隊出戰。統兵將軍爲水師提督魯西亞。大將雕哥律。突將挪耳。法兵分爲數軍。一攻士田所屯之普軍。士田在勝顛尼礮臺之外。一攻李波節所屯之普軍。一攻沙倫處所屯之塞慎尼兵。皆爲普軍所擊退。翼日。法軍不復出戰。但由波捷礮臺。用礮轟攻普師。旋即退入法京。二十三日。法國飛合將軍。統兵六萬。與普國蠻雕飛將軍。大戰於亞棉城東北。普第一路軍。爭先陷陳。轉戰數時。大敗法軍。時法兵皆散布於阿近村落中。普軍迭以大礮環攻之。焚燬過半。旋逐法軍踰沙刺山谷。是戰也。法軍兵數雖多。礮隊雖衆。而一敗不

振。失地無算。如標葛鄉捫的尼鄉扶厘仙葛鄉瓜魯鄉。盤怒爹巴時。域嬌捫都亞。皆爲普軍所取。是日。兩軍相持。迨暮始止。翼日。味爽。普軍連騎奮進。再逐法軍往亞刺城。擒者千人。奪獲大礮數尊。是役也。普軍以少勝衆。約計兵士三萬人。餘勇一萬人。法國飛合將軍。當退走。盤怒爹時。乘馬中鎗而斃。幾瀕於危。麾下以他騎授之。始得免。普軍臨陳。喪亡者亦衆。普法兩軍戰於來耶。法軍稍利。法軍退出亞刺城。威克利地方爲普軍攻毀。俾兒佛城被圍以來。法人時思潰圍突出。於二十六日。率衆出戰。普軍擊敗之。旋退入城。普國所俘法兵。有潛謀歸國者。後以謀洩。不果。二十三日。麥蓮畢公爵。統率大軍。與法國山時將軍。大戰於雲耽。法軍群踞高處。以墨



迭兒魯士礮環擊普軍。普軍死者枕籍於道。普軍於下以巨礮還攻法軍。喪亡者亦甚多。山時將軍見勢不敵。遂退走。二十六日。普軍五六百人。突入勝加利城。勒捐軍餉佛狼銀錢二萬枚。民間集資畀之。始退。普人選撥餘勇無數。以爲法京外司礮者。所有巨礮飛銃。皆已位置於礮壘。初普國軍機大臣定議。於十二月十三日。始行開礮攻法京。然猶徐以俟之。不果發。至二十七日。普王命轟攻法京東隅亞父倫礮臺。爲普兵大礮所毀。法京將士。以普軍之以礮攻也。突出苦戰。普軍頗有傷者。德祿蘇駐營於華刺連礮臺。法京壯麗爲天下冠。樓臺櫺比。高插雲漢。幾可摘星捧日。有盛服登其上者。憑欄眺望。見者疑爲天際真人。其雕鏤錯燦。金碧聳煥。幾令

人不可逼視。今一旦爲普軍大礮所擊。恐其不復逮昔時之盛。聞者無不惜之。京中兵民一百五十萬有餘。而糧不足以支一月。前日普相已行文於歐洲列國云。他時法京若破。其民流離瑣尾之苦。當有不可言狀者。然不得以此爲我國咎。因我國固不能備如許食物。爲撫恤也。是在彼廷臣持議之不決耳。法京被圍日迫。運道不通。食物價俱昂貴。十二月二十七日。所有衢市間交易者。驢騾肉每磅計佛狼兩枚。貓每頭佛狼八枚。狗每頭佛狼十枚。鴨每握佛狼二十枚。鷄每尾佛狼十五枚。羊腰一佛狼兩枚。羊肉一小方大僅若掌佛狼一枚。鷄卵一佛狼一枚。牛油每磅佛狼十五枚。法製豬腸每條仙甜士五十枚。火雞一頭佛狼三十枚。鵝一佛狼四十



枚。羊蹄四佛狼十二枚。加非佛狼三枚。糖每磅仙甜士八十枚。鹽每磅佛狼一枚。仙甜士五十枚。胡椒佛狼一枚。仙甜士五十枚。猪油每磅佛狼五枚。菜油每磅佛狼五枚。燈油每磅佛狼二枚。燭每磅佛狼二枚。物價騰貴。至於如此。可謂異常矣。京中富貴家。尙得肉食。牛羊俱備。羽族亦有水鳥。中等士民。家馬驢狗而已。編氓小戶。則食貓鼠矣。圍城中光景。慘苦如此。覺殊不可久矣。考諸中國史冊。如宋被楚圍。易子而食。析骸而炊。唐天寶間。睢陽之圍。亦至羅掘俱空。北宋壽州之圍。米麥每斗至一金有餘。元明之末。兵燹徧地。有操金珠盈升。而無米可易者。今法京之困。尙不至是。而其憊亦甚矣。所云佛狼銀錢一。抵呂宋銀餅五分之一。仙甜士銅錢百枚。

值佛狼一枚。論者謂法京之絕望。由於魯華河上之兵敗北。魯華河上之兵。一敗不振。由於阿連之復失。然其事實有相因而見者。普郡王之由蔑士往阿連也。其遄征。時在十一月九日。是日丹將軍失守阿連。爲法軍所擊退。故普郡王聞警卽行也。或謂法將巴刺顛。若於普郡王未至時。乘戰勝之餘威。統全軍以奮進。追襲丹將軍。而援法京。亦復誰能阻之者。然其不往也。恐非巴刺顛之失策也。蓋其所部之軍。徵募猶新。未經訓練。軍實軍器。又復不敷。卽欲往援。豈能有濟。觀於禮吳河法軍之敗。亦由餉糈不足耳。巴刺顛有不惕於前車之覆哉。惟法軍於時克復阿連。勢正可用。乃卽坐守空城。不出一。步。竟使普郡王得以長驅直進。以爲之助。而後丹將



軍。因以收合餘衆。其軍復振。是則法人之疎也。及至十一月二十日。郡王之兵已抵卑地威亞。麥蓮畢公爵之兵已渡魯華河而南。而法軍始出截擊。則事機之去。殆不可挽矣。十一月二十八日之戰。舉六萬之衆。攻普之間挪兵。雖始利。而終卻。迨郡王以第三路軍襲其後。卒至於奔北。十一月三十日。郡王遣兵往標呢之南。以偵虛實。擒法軍於布琴父。此時法人即欲入援。已非血戰不可。十二月一日。巴刺顛與麥蓮畢公爵大戰於河上。普軍稍卻。退駐亞田尼之北。二日。麥蓮畢公爵攻法兵。法兵退駐巴卑厘巴題。此二城旋為普人所破。三日。郡王率魯華河之普兵。擊法軍敗之。遂下亞田尼。詩威厘。

法兵既敗。遁入二城。故郡王乘勢下之。

四日。普人乘法軍之退也。再攻之。右攻機

地。左攻沙吉。法兵接戰。先勝後敗。普人因襲之於師蘭。於是法之將士。胆喪氣沮。前阻大河。即魯華河也。後臨勁敵。計無所出。蒼黃覓渡。輜重器械。委棄山積。法國廷臣。於是檄責巴刺顛。謂其吹角撒隊之時。正普軍藥彈已窮之際。倉猝遂退。何至於此。不知普營軍備。素稱充裕。雖短絀於須臾。自能接濟於頃刻。此未足以制普軍也。普軍既得阿連。後二日。為十二月七日。麥蓮畢公爵即已統帶第十七隊軍。并巴華厘亞兵。奮攻法軍。驅法兵九千於美庸。追法兵大隊於標賤士。時法兵固屯集於此。頃之。雖有各兵來援。衆至三萬。而普之第二十二隊兵亦至。八日。法兵戰北。逐之於馬尖那。十日。法兵先攻普。不得利。以普軍固百戰之勁旅。而法兵乃新集之餘衆。是



時普軍已抵哥來邑摩厘邑矣。普第九路軍既得阿連。於十二月十二日。竟渡魯華河。或謂按之兵法。實爲極險。若法先王拿波崙第一。於此必伺普軍半渡而擊之矣。郡王能兵者也。而竟出此下策。蓋視法國爲無人矣。然普軍竟以偏師取布來。以第十路軍攻雲耽。法兵遂於雲耽退趨里蠻。普軍遙襲其後。逐北追奔。不遺餘力。其時麥蓮畢公爵屯兵於哥連摩厘。第九第十兩軍屯於布來。第十路軍往攻雲耽。而第三路軍又自阿連調至矣。其自阿連來也。一晝夜馳一百二十六里。進軍神速。無逾於此。觀普法戰事情形。卽知法新軍之非善戰。郡王之爲能兵。勝負之數。瞭然可觀矣。法京之欲不危得乎。法國魯華河上新兵。常痛斥廷臣監必得。不早與

普和。自取覆亡之禍。督隊各官。均不聽大將節制。踴躍從事。卒以遲迴審顧。坐失機宜。行軍如此。安得而不敗哉。故法之蹶也。自取之也。非戰之罪也。



普法戰紀卷八

終

校合山田榮造



